





*Given to me by dear Mr Bracebridge  
Nov: 6. 1865.*







Digitized by the Internet Archive  
in 2016



# HADRIANI

IVNII MEDICI

EMBLEMATA,

AD

D. ARNOLDVM COBELIVM.

EIVSDEM

ÆNIGMATVM LIBELLVS,

AD

D. ARNOLDVM ROSENBERGVN.



ANTVERPIÆ,

Ex officina Christophori Plantini.

M. D. LXVI.

CVM PRIVILEGIO.

QVORVM PRINCIPVM AVCTORITATE  
CAVTVM SIT CHRISTOPHORO PLAN-  
TINO, NE QVIS PRAETER EIVS VO-  
LVNTATEM HAD. IVNII MEDICI  
EMBLEMATA EXPRIMAT, AVT DI-  
VENDAT, IN EXTREMO LIBRO DE-  
CLARABITVR.







CLARISSIMO SPLENDI-  
DISSIMOQ. VIRO ARNOLDO  
COBELIO, QVÆSTORI ÆRARIO  
HOLLANDIÆ MERITISSIMO  
HADR. IVNIVS MEDICVS.



ANVARII Calendas an-  
ni auspices largiendis strenis  
sacrauit antiquitas. atque ea  
consuetudo iam inde à Tatio  
Sabinorum Rege in posterita-  
tem transmissa est: quem verbenas felicitis  
arboris ex luco Streniæ, noui anni auspi-  
ces primum accepisse auctor est Symma-  
chus, argumento indubitato viris strenuis  
eas conuenire, atque ob virtutem deberi.  
Decreueram itaq; veterum factum imita-  
tor non otiosus affectari, ornatiss. Cobeli,  
ac dedicato tibi, missoq; strenæ vice libel-  
lo Emblematum Calendas præuertere,  
sed voluntatem eam sedulitas quædam  
sibi instans nec ferè vnquam sibi satisfa-  
ciens

ciens abruptit: eam tamen occasionem elapsam eo minùs iniquè patior, quo libri moles magis excreuerit, quo Emblematurum numerus sit auctior, hoc est, quo largior usura fenori accesserit. Bonæ fidei contractus rescindi nequit, cõperendinari potest, habitafenoris ratione. Itaque seriùs ad te xenij loco proficiscentem libellum, ex corollarij superpondio nihilo deteriore putabis. Neque verò ex prolixitate captare fauoris auram studui, quando vnumquodque Emblemata libelli materia futurum fuerit, si compendio operosam verborum struem prætulissem; ac nisi tam posse occupato tibi displicere prolixitatẽ cogitasset, quàm mihi aut desiderantibus alijs est grata. Nimirum malui eundem mihi linguæ modum, qui est ingenij, qui est fortunæ. Scripsi autem plura, quàm iniunxeras, vt delectum instituere tibi sit integrum, itidem vt sit in lustratione exercitus, vbi triarijs & veteranis primus habetur locus, capite census & gregarijs numero summotis. Plusculum operæ positum est cùm in reddenda symbolorum ratione, quæ obscurior paulo est, eo quòd breuitatem captanti, singulis versuum quadrigis, & picturæ typum & symboli rationem includere necessum



cessum fuerit, tum in explicando picturæ  
apparatu, vt ne pictor, quia locis disiungi-  
mur, quidquam hîc desideraret. Adde  
quod impensius & de industria fategi, va-  
rietate metrorum condire opus, vt vnifor-  
mis lectionis fastidium hac parte leuare-  
tur. Vale feliciter & nos ama. Harlemo  
sub Idus Ianuarias.

A 3

I.Sam-



# IO. SAMBVCVS HADR.

IVNIO SVO S.

ACC EPTI tua Emblemata; de quibus etsi tu nimium modestè sentis, aliud tamen fore publicum iudicium videbis: nam & sana, & varia, elegātiaq; sunt, & facilè auctorem, officinamque testabūtur. Quòd verò mea tantopere expetis, ante Aprilem ob sculptoris & pictorum moram vix apparebūt: quæ si videtis, minuetur desiderium legendi ea, & verè τῶν κοπριῶν ἐκβλητότερα dices. Tu verò tandē nobis Sudam restitutū, epithetorum Græcorum explicationes, Noniū, & alia extrudas: nec, quasi nondum absolueris, otium differēdo queras; teq; ad alia accingas; vt, quando Erasimum vestrum ingenio æquare cœpisti, numero quoque lucubrationum inferior ne sis: dumque ætas, viresque permittunt, τὴν τῆς χρόνης συνέχειαν συναφεία quadam καὶ εἰρμῶ velut librorū, qui nisi eruditi esse nequeūt, posteris repræsentantes. Vale, & Sambucum amare pergito, sed minùs laudato: quis enim, quàm ego, me nouit meliùs? Antuerpiæ. I I I I. Idus Februarij. Anno M. D. LX I I I I.



Reprehendere procliue: & animum  
apertum esse debere.



*N* octe satus, genitore orbis, sum nomine Momus,  
Dente Theonino singula rodo lubens:  
*F*ingi hominem caussor clathrato pectore; apertis  
Sensibus occultum ut nil specus ille tegat.

A 4

Rabu-



## Rabularum odium.



*Grunitum suis immundi cane peius & angue  
Indus Elephas inuisum habet.*

*O bstreperos rabulas, qui litibus omnia miscent,  
O disse par est principem.*

Gloria



Gloria immortalis labore parta.  
 Ad reuerendiſſ. Cardinal. Granuellanum  
 Ant. Perrenotum.



*T*ortilis & caudam ore tenens hic termite lauri  
*A*mbitur anguis, & ligonem circuit.

*G*loria continuos nunquam moritura labores  
*S*equitur, virensq; in ore vivit perpetim.

A S Impu-

Impunitas ferociæ parens.




*Insultant pauida hic natio musculi  
 Clausis muscipula carcere felibus.  
 Sublatoque metu fortè periculi  
 Crescit tunc animus degeneri insolens.*

Vita



Vita mortalium vigilia.  
*Ad D. Viglium Zuichemum Præsidentem.*



*Inuigilare libris, studio metirier horas,  
 Pars vitæ est princeps: otia vita fugit.  
 Fama vehit vigiles, sepelitq; obliuio inertes:  
 Hoc liber explicitus, clepsydra, lychnus habent.*

Ex



Ex pace rerum opulentia.



*Aureolum dextra gestat Pax Attica Plutum,  
 Laeva tenet cornu plenum ubere copia.  
 Gliscit opum satias, & rerum copia leta,  
 Pax ubi Marte triumphato viget aurea.*

Quod



Quod in te est prome.  
 Ad clariss. virum Ioachimum Hopperum  
 Consil. Reg.



*Rimaris tundendo sinus tibi pectoris altos,  
 Et vitam soboli das Pelecane tua.  
 Perscrutare animum, quære in te quod latet intus:  
 Ingenij in lucem semina prode tui.*

Calum-

## Calumnia dira pestis.



*Hic radio letifero tacta, velut sidere, Pastinatae,  
 Exuitur celsa pirus deciduam luxuriam comarum.  
 Haud aliter vipereo vaniloquus dente calumniator  
 Attalicas vertere opes, cōditionem q̄ potest superbam.  
 Inui-*



Inuidia integritas affecla.  
*Ad Cornelium Susium Hollandiæ  
 Præsidem.*



*P alma caput tollit celo ardua, cuius ad ima  
 R ana loquax, stabulantur & hydri.  
 O ppugnant procures, quorum via consona recto est,  
 D egeneres, atque inuida lingua.*

Deside-



## Desiderium spe vacuum.



*Ceruina potitur rabidus Leo: suspicit catellus.*

*Captatq; rictu prædam inops opimam.*

*Sic hereditatis aliena vorantibus, sed ore*

*Sicco, euenit, quos funeris trahit spes.*

Impro-



Improbè Deum fatigamus, votis vt  
nostris seruiat.

*Ad Splinterum ab Hergen Eq.aur.*



*L atoiden Cadmæa Tyros deuinxerat auro:  
G radium tenuit compede Sparta grauem:  
P repete priuarunt penna Victoriæ Athenæ,  
Q uisque suis votis cogit adesse Deum.*

B

Vxo.

## Vxorix dotes.



*Illequeata sedet pedicis, pudibundaq, velat  
Vultum Venus Spartana flammeo.*

*Vxorem castus pudor, & constantia amoris,  
Custodia & sui laris decet.*

Pru-



Prudentia cum robore coniuncta.  
*Ad clariss. virum Philippum Cobelium  
 Regium Consil.*



*Viribus Cyllenius integris stat  
 Iunctus cum senio graui.  
 Robur inuictum est, sapientia si  
 Firmes: qua sine, concidet.*

B 2

Prin-

Principum opes, plebis adminicula.



*Pyramides Phariûm monumenta perennia Regum,  
Errantibus circumligat hedera sequax brachiis.  
Regum opibus firmis plebs sustentatur egena:  
Mentisq; constans firmitas virescit perenniter.*

*Seipsum*



Seipsum vincere, palmarium.  
*Ad Arnoldum Sasbotum Senatorem.*



*P ampineis cristatus Epops, vide, vt ager ab vuis,  
 M unit adianti se virente ramulo.  
 S e Sophiae monitis mens, serua affectibus, armat:  
 T emetiq<sub>3</sub> vires frangit abstinentia.*

B 3

Cun-



Cuncta complecti velle, stultum.



*Ventosas pueri bullas per inane volantes*

*Prendere dum satagunt, opera exit inanis.*

*Qui varia attrectat studia aut venatur honores*

*Ambiguus, pueris mihi stutior ille est.*

Coer-



Coërcenda & extirpanda impietas.

Ad D. Iacobum Susium virum doctiss.



Hostis colubris ales insidet scepro,  
 Substrata quod Niloi equi premit terga.  
 Domat superbos, impiosq<sub>3</sub> proculcat  
 Sceptrum æquitatis, noxiosq<sub>3</sub> consumit.

B 4

Au-

Audito multa, loquitor pauca,



*Aure concipit, parit*

*Mustela foetum postea in lucem ore.*

*Aure dicta concipe,*

*Diu at recocta parcius prome ore.*

Pro-



## Prouidentia.

*Ad Iacobum Endium reipub. Holl.  
caussarum vindicem.*



*Quò sacer excurrat Nilus in arua,  
Præsciis, alluuiæ libera ponit  
Oua, monens meritò nos Crocodilus  
Quæ fata immineant antè videre.*

B 5

Exi-

Exiguo contentus, potiora sperans.



*Libat rauca rosas cicada hianteis,  
Clausas præterit vsui futuras.  
Præsenti fruitur, suo beatus;  
Et fatis melioribus parat se.*

Eru-



Eruditionis decor concordia, merces gloria,

*Ad doctissimum Ioannem Sambucum  
Pannonium.*



*C*or pedibus iunctis, rostris concordibus aurum

*N*aupliadae prendunt, munera sancta, grues.

*G*loria debetur studiis, atque asseda merces,

*C*oncordesq; animos candor ubique decet.

Adu-



## Adulator salutis reip. grauis.



*Vt Leo, quem caci vis lancinat effera morbi,  
 Sentit opem, si Simium edat, citam:  
 Palponem & dirum sycophantam qui eijcit aula,  
 Rex viru regnum vacuat graui.*

Diui-



*Diuina scrutari, temerarium.  
Ad Cornelium Musium Delphum.*



*Immatura sitim Pharia arcet Palma, eadem  
Sensus præpedit, & linguam matura ligat.  
Scrutans celsa Dei mysteria, lingua, animo  
Hæret; at ille sapit qui vestibulum haud superat.*

*Virgi-*



Virginem pudicitiae, matronam  
domus satagere.



*Cernuus armis onæ præbet Draco colla Minervæ:*

*Domiportam at exierit Venus testudinem.*

*Virgo sui satagit decoris bene prouida: at vxor*

*Frugi silet, nec limen excedit domus.*

Medi-



## Medici Icon.

*Ad Martinum Aedituum Medicum  
in signem.*



*S ceptriger, & lauro, baculoq; instructus acerno,  
Quid Draco, quid Gallus vult sibi, quid ue Canis?  
Imperat hic agris, operosaq; arte medetur,  
S edulus, & fidus, dignus honore, vigil.*

Fortu-



## Fortunæ instabilitas.



*Stare loco nescit certo Sors lubrica, sedes*

*Quærare docta nouas.*

*Hinc pedibus mutilam, & subnixam remige penna*  
*Smyrna Deam posuit.*

Ser-



Sermo de Deo apertus, mens sit occulta.  
*Ad Ioannem Becanum Medicum clarissimum.*



*P*ersea fert linguae similes, sacra Isidi, frondes:  
 Typumq<sup>3</sup> cordis poma turgida exprimunt.  
*S*ermo index animi, de numine sentit aperte;  
*C*or cæco operculo intus arcanum tegit.

C

Prin-

Principis calamitas, priuatorum dissimilis.



*Stat vidua quercus lato honore frondium,  
 Quas rapido Boreas decussit asper turbine.  
 Princeps auitum, saua cui refixerit  
 Imperium Nemesis, tuetur is gentis decus.*

Sacer-



Sacerdos castus & animi liber.  
*Ad Matthiam Herium.*



*Quid fugitas hederam manibus contingere Flamen?  
 Solidum quid annulum atque nodosum fugis?  
 Illaqueatricem Venerem vitato sacerdos;  
 S is liber animi, nec mali tibi conscius.*

C 2

Sero

Sero detrectat onus, qui subit.



*I ugo repanda colla seruili effere  
Exuere molliter paras taure irrita.  
Sero recusat, qui capeſſit, iugum  
Connubiumq<sub>3</sub>, munera & ciuilia.*

Idem



Idem salutis & exitij fons.  
*Ad Antonium Hofslach Aduocatum.*



*Nos necat elleborus, capris adipem auget, auiq̃:  
 Idem ignis fomes, & populator opum est.  
 In fontem & fontem facundia præstat eundem:  
 Nunc est exitium, nunc medicina salus.*

C 3

Cele-



Celeritatem mora, & hæc illam  
vicissim temperet.



*Quid scamno reses, obtendis testudinem & alas?*

*H umum hinc premis vestigio, calce hinc calum appe-*

*Temperiem cunctis adhibe, remoram inijce: si sis*

*Celer nimis, velocitate tempera moram.*

Boni



Boni adulterium.  
A d Ioannem Zurenum Harlem.



*F unesto Arachnen flos idem succo replet,  
A piq<sub>3</sub> mella sufficit liquentia.  
Concordiæ litisq<sub>3</sub> idem dictum est parens;  
S criptura prauis sica, fit scutum bonis.*

C 4

Vinum

## Vinum ingenij fomes.



*Vuiferum Bromium, volucrem sed prapete penna,  
 Quid tacita posuistis Amyclæ?  
 Tollit humo ingenium Bacchus, mentem erigit altam.  
 Pegaseaq; velut vehit ala.*

*Quæ?*



Quære adolescens, vtere senex.  
*Ad Andream Osteruicum Splinteri filium.*



*Hinc dum viget, duro labore exercitus,  
 E phebuis, hinc senex beato Copia  
 Cornu fruens, opum & dapis læta satur;  
 Iuuenem parare commonent, vti senem.*

C 5

Vene-

## Veneris potentia.



*Quid Cytheræa polum fers vertice? vis mea scandit  
 Cælum, & Ioui dat iura. quid papauera?  
 S opio corda hominum quamuis fera. roscida quorsum  
 Mala? illices esse has voluptates puta.*

Virtus



Virtus difficilis, sed fructuosa.  
*Ad clariss. Hieronymum Tennerum, Regis  
 Daniae Cancellarium.*



*Pomum insigne geris Cybeles, dura cute opertum,  
 In torulis dulces cui stabulant nuclei.  
 Ardua vallatur duris sapientia scrupis;  
 Dulcibus ast eadem fructibus illa scater.*

Femi-

## Femina improba.



Cùm ruit in Venerem, blanditur Echidna marito,  
 Mox satura insertum præscidit ore caput.  
 Improba palpatur, tentigine feruida coniunx;  
 Continuò letum poscit anhela viri.

Malo



Malo oppressus, deterius formidat.



*C*lathrata cauea macerie clusa columbula  
*I*ncuruis aquila permetuit carpiet vnguibus.  
*F*ormidat grauius sollicita mente periculum  
*A*fflictus: capiti is rite suo consulit & rei.

Amo-

## Amoris ignis perpetuus.



*Hinc tadam vt suus ignis edat teretem, vide  
 Illinc vt rapido male liquitur à rogo.  
 Visa tabet amans miser igne puellula:  
 Absens tabifico haud minùs vlcere carpitur.*

Lin-



Linguam compescito.



*Pigram quid aluum comprimis caua manu,  
Quid vda labra, quid salax inguen Schythæ?  
Abdominis studium, & grauem luxum fuge,  
Linguamq; frena prodigam vel maxime.*

Deum

Deum &amp; ama &amp; time.



*Mysterijs addicta Memphis æde pro sacra  
 Sphingem biforem dedicauit, symbolum Dei.  
 Amato numen ceu pijs mite, ac placabile:  
 Rursus time, vt vindex inexorabile impijs.*

eiξας



*Eiſas viſa, ſiue victrix animi æquitas.*

*Ad Victorem Giſelinum.*



*Vis Boreæ obnixas violento turbine sternit*

*O rnos: Arundo infracta eandem despuit.*

*Fit victor patiens animus cedendo furori:*

*Insiste, Victor, hanc viam & re, & nomine.*

D

Biuium

## Biuium virtutis &amp; vitij.




*Hinc luxu compta, inde situ horrida femina pugnant  
 A lcidem in partes flectere quaque suas.  
 Nititur inculta hinc iuga scandere se duce Virtus,  
 Hinc Vitium pronos mergere delicijs.*

Deum



Deum odisse impudentiam.



*Pernix accipiter, piscis, Nili incola dirus*

*E quus, quid ordine hærent?*

*Symbolon hoc loquitur Pharia tria verbula genti,*

*Deus odit impudentes.*

D 2

Irae

## Irae malagma philosophia.



*Getulus Leo non sic aliud, quàm metuit  
 Tædæ flammæ uocem, quæ rabies seu cadit.  
 Sedit trux animus vel facibus luciferis  
 Cælestis sopiæ, aut supplicij terriculis.*

Hinc



Hinc dolor; inde fuga, grauis.



DE DVOLIMI STRVGGO, ET  
DI FVGGER MI STANCO

*Quid, Cerue, Cressa fixus arundine  
Laxas habenas præcipiti fugæ?  
Hæc sors amantis, quem fuga concitat:  
Mentem intus exest vulnus atrox nimis.*

D 3

Prin-

Princeps ne cui aures seruas præbeat.




*S ublimem ere Iouis statuam, patula aure carentem,  
S acrarat Minoia Creta.  
P rincipis est, regnum dextra moderantis habena,  
S eruam ne cui commodet aurem.*

Amo-



## Amoris ingenui tormentum.



*En vt igneum facis cornusca lumen*  
*Insit culex proteruus, ac necat se.*  
*Haud secus suos Amans misellus igneis*  
*Persequens, crucem inuenit, suumq<sub>3</sub> funus.*

D 4

Vxo-

## Vxoriarū virtutes.



*T estudo premitur pede; clauem dextra retentat;  
 Vacat obstruendo dentium septo altera.  
 Ne vaga discursset coniux, neu futilis esto;  
 Ipsamq<sub>3</sub> cura opum tuendarum addecet.*

Nec



Nec igni, nec ferro cedit.



*Bipennis hinc, fax inde viuum ignem vomens,  
 Nexum adamante suo decussat annulum probè.  
 Fortis animus, constansq; victor omnium,  
 Despuit intrepidus pericula & seuas cruces.*

D 5

Venter

Venter, pluma, Venus laudem  
fugienda sequenti.



*Quò fugitiua ruis, quem'ue auersata relinquis  
Gloria clara virum?  
Defero suffultum pluma, Venerisq<sub>3</sub> ministrum,  
Mancipiumq<sub>3</sub> gula.*

Veri-



Veritas tempore reuelatur, diffidio obruitur.



*Quid penniger Saturne in auras virginem nudam rapis?  
 Quid seminarum cœtus aggesta obruit terra scrobem?  
 Specu emicantem veritatem, Temporis natam, triplex  
 Obrueret pestis apparat; Lis, Inuidia, Calumnia.*

Dis-



## Discordia exitialis.



*Sanguineam quatiens hastam, caput horrida echidnis  
 Folle focum subigit, flamma vnde fumusq<sub>3</sub> exsilit.  
 Exitiale parens animat discordia bellum,  
 Improba lingua mali, cedisq<sub>3</sub> seminarium est.*

Can-



## Candor ingenuus.



*Exsorbet saniem huiusmodi atra musca:  
 Mel dulce haurit apibus thymo ex amaro.  
 Doctos ingenuus decere candor,  
 Obrectatio lividos putatur.*

**Animi**

## Animi scrinium seruitus.



*Luscinia veris nuncia,  
 Mutescit inclusa cauea.  
 Est seruitus scrinium animi,  
 Linguamq; vinclo præpedit.*

Locu-



## Locuples satellitium diuitum.




Et pilis horret, tractuq<sub>3</sub> obserpit Iulus  
 Arquato, ac præfert agmine mille pedes.  
 Ansati incedunt procures, glomerantq<sub>3</sub> superbos  
 Gressus; assequitur longa caterua comes.

Am.

*Affiduitas duri victrix.*

*Ad Petrum Iunium filium.*



*Fistucas auro triplices, monumenta laboris  
 Continui, semper Susia gens coluit.  
 Assiduus labor, & sollers industria, quid non  
 E domat? huic cedunt omnia, dura licet.*



## AD LECTOREM.

*QVÆ ratio Athenienses olim mouit, ut cum publicis execrationibus sancirent; ne quis ulli unquam via ignaro indicium denegaret; ea nos quoque adducti non nihil operæ sumpsimus in emblematum nostrorum origine, usuq; ostendendo: ita tamē, ut inter ea quàm minimū à vera eorum ratione & natura recederetur. Non enim ignoramus, eo plus venustatis, & gratia istiusmodi scriptis accedere, quo ingenium acuunt magis; hoc est, quo suspensum diutius & sollicitum Lectoris animū tenent; maioreq; postea, quàm intelliguntur, cum voluptate in sui admirationem capiunt: præsertim cū aptè subtiliterq; inuenta solidi quid & præclari incunda obscuritate, quasi obtento velo, tegunt. Itaque, etsi amicorum non nulli melius legentium auiditati consultum iri putarent, si unicuique symbolo sua interpretatio statim subiungeretur: nos satius tamen esse iudicauimus; ordinem planè diuersum sequi: & alteram quasi operis partem ipsum facere commentarium; qui hariolandi, coniectandiq; palma prius in medio posita, aut bene iudicantibus deinde succinat, aut minus assequeantibus facultatem intelligendi subministret, ductorisq; vel, si ita placet, interpretis vicem subeat. Idem de ænigmatis consilium secuti sumus, in quibus ea quæ ibi præfati sumus, hærentem facile expedient. Vale.*

MOMVS reprehensionis conuiciq<sub>3</sub> Deus apud priscos fuit habitus, quando etiam vitys, morbisq<sub>3</sub>, & multis etiam pestibus sua illi præfecerunt numina.

Hunc Hesiodus poëta in Theogonia Noëtis filium prodidit, absque genitore: quo fit ut nonnulli secuti fidem editionis Veneta longè omnium mendosissima lapsi sint: Somnum parentem illi attribuentes. Erroris occasionem dedit vox, ὄντινι, quæ, nemini, significat, eamq<sub>3</sub> lectionem interpretes Græci agnoscunt, & sequuntur cùm alij legisse videantur, ὦ τινι, id est, cui, ut referatur ad somnum, nō animaduertētes, quod hunc Noëte editum fuisse dixerit, quodq<sub>3</sub> incastum matris cum filio inuēcturi sint. Cur autem fabuletur Noëtis filium Momum, sine patre: hanc mihi perspexisse rationem videor, tum quod vitilitigator in altissima ignorantia atque errorum caligine versetur, & lucis ingenij defectus studioq<sub>3</sub> aliena reprehendendi nihil ipse rectum gignat, sed emissitiis oculis aliena peruideat: tum quod ex occulta & abdita ratione illa carpēdi libido nascatur. Sine patre verò, quod incerto auctore & è vulgo plerunque oriatur istud reprehendendi calumniandiq<sub>3</sub> studium, quomodo vulgo conceptos dicimus, qui certum patrem demonstrare non possunt. Ob superiorem rationem etiam fuscum et coloris mulæstini faciē pictura illi tribuit, additis nigris & dentibus & unguibus; qui maledicentiæ symbola sunt, iuxta illud Epigrammatarij:

Nigros contorsit linidus ungues.

Idem alatus pingitur, quod reprehensione, ac maledictis nihil perniciosius; quæ facillimè emittuntur, citissimè excipiuntur, et quaquaversum latissimè diffunduntur, ut



ut sensit Cicero ꝑ Plancio. quo spectat et Alcæi versus:

Μῶμος λαυφρὰς ἐξέφυγεν πτέρυγας, id est,

Pernicies Momi pennas effugerat unus.

Epigrammata Græca Momum effigiant senem subie-  
cta manu fulciētem calua tempora; quæ species innuit  
senile plerunque esse reprehēdendi vitium, eoꝛ morbo  
laborantes vitilitigatores, cogitabundorum more, me-  
ditari semper ac comminisci quod carpant. Adiungo  
illi et Invidiā indiuiduam comitem: hoc consilio, quod  
emulatio fermē accendat foueatq; istud vitium. Fa-  
bula notissima est ex Luciani Hermotimo de sectis,  
quam compendio recensebo. Nata inter Palladem,  
Neptunum, & Vulcanum contentione: quis utilius  
opus commonstaret, Neptunus taurum, sine ut alij,  
equum velut arationi vecturæque accommodum in  
primis animal in medium statuit: Pallas domicilium  
ostendit, cuius vsus contra iniurias aëris omnes infer-  
uaret: Vulcanus fictum hominem pro facile præ-  
stantissimo opere exhibuit. Delectus arbiter Momus,  
præter alia quæ carpsit, caussatus fuit in hominis opi-  
ficio præteritos fuisse ab artifice clathros, seu fene-  
stellas, pectoris parieti inferendos; per quos, ne quid  
occultum lateret intus, introspecti posset. Idem etiam  
Veneris sandalium, ut argutum nimis atq; loquax,  
calumniatus fuisse legitur. Porro nihil in vita mor-  
talium tam numeris omnibus absolutum, tam do-  
ctum, tam rectē factum inuenias quod non, inna-  
tus Momis quibusdam, calumniandi & carpēdi  
morbus conuellat, aut saltem incessat: adeo procli-  
uius fuit seculis omnibus, *μωμίζειν ἢ μωμίζειν*, id est,  
Momum quā minimum agere. Itaque tum hunc ad  
sensum refertur Emblemata, quod reprehēssioni obnoxia  
E 2 sint

*sint omnia : tum etiam ad id quod prudentissimè doctissimeq<sub>3</sub> dictum à Socrate memorat Vitruuius, oportuisse hominum pectora fenestrata & aperta esse ; ne occultos haberent animorum sensus ; sed ad considerandum patentes : siquidem corde nihil sinuosius, nihil insidiosius fabricata est natura , ut solius Dei sit sensus & cogitata hominis inspicere atque pernosse.*

*Pictura . Senex pingatur caluus, colore fusco, luvidis dentibus unguibusq<sub>3</sub>, alis supra humeros exstantibus, laua caput sustentans cogitabundi in morem, dextra indice extento versus effigiem quandam hominis, clathratum pectus habentem : adstent procul Pallas cum domicilio : Neptunus cum equo : proximè illum Vulcanus cum homine suo, ita ut simulachrum hominis clathratum diuersum sit ab homine Vulcani, velut Momo designante, talem oportuisse fingi . Quod ad picturam Deorum attinet, ita semel statuo : Neptunus nudus pingatur, capillitio cæruleo, altera tridentem complexus, altera manu equum habena tenēs, pede delphinum premens. Vulcanus atro colore ut faber, rugosus propter assiduos ad incudem labores, laua malleum tenens, dextra hominem à se fictum cōmonstrans, claudus, capite præferens pileum cæruleum, cuiusmodi fermè figura spectatur Ducis Veneti tiara .*

*Palladis effigiem dabo Emblemate. I 5*

### Emblema II.

*Carmen est Heroicum cum dimetro Iambico, quale illud Horatij:*

*Nox erat, & cælo fulgebat luna sereno  
Interminora sidera.*

*S V S animal est infestissimum Elephanto, usque adeo ut vel solo illius stridore atque grunntu audito, immanis illa bellua in fugam agatur ; id quod hostilia*

*tela*



tela facere nequirent : unde insulsum illud Mahometi, plani & impostoris perditissimi, commentum risum quibusvis commouere possit, prodentis olim diluuij tempore in arca Noæ suæ elephantī sterquilinio genitura suæ originē acceptam referre, ut ex eius fimo enatum. Sed ut hoc ridiculum, quippe ab homine rerum naturæ ignaro proditū; ita illud confirmat auctorum unanimis consensus : siquidem præter Plinium, Orum, Zoroastrem, Senecam, Alianus libro de animalibus primo, suis stridore minimo terreri elephantum locuples testis est : qua ratione cognita Romani commissi cum Pyrrho Epirotarum rege prælio, victores exstiterē; cū elephantēs eius regis obiectis suis in fugam compulissent. Memorabile adeo est nec silentio obliterandum, quod à Megarensibus factum proditur, eodē auctore lib. 16. c. 36. quod cū ea urbs arctissima obsidione ab Antipatro Macedone pressa, acerrimè oppugnaretur; oppidani sues liquida pice perlitos prius, admotāq; flamma succensos in hostilem exercitum immisere, qui depascente iam illorum corpora incendio, latè grassantes, ac horribili stridore in confertum elephantorum agmen delati, belluas velut in rabiem concitas disturbatis ordinibus in fugam verterunt. Huc faciunt verba historici, quæ nobis integra seruauit Suidas in hunc sensum. E vestigio appensa de turri sue, periculum quod ab elephante ingruerat, euitarunt. siquidem atrocem grunnitū cū mox edidisset suspensus porcus, elephas id non ferens inhorruit. Illud verò tanquam controuersum ambigi potest, natium'ne sit quoddam atque intestinum inter hæc animalia dissidium, cuius causa mortaliū ingenijs sit incognita; an quod raucum illum strido-

rem, vocemq<sub>3</sub> auribus asperam natura exhorrescant: cuius rei gnari, qui pullos elephantum educant, iam inde à primis annis sues adhibent ut assuetudine paulatim mali illud vincant. D. Amb. in Hexaëmero videtur istud referre ad prerogativam quandam à natura singulis animantibus donatam. Suibus aptissimè comparantur non insulsi modò, & à Minerva alieni homines; verùm vel maximè lingulacæ, & à rabie non malè dicti rabule, qui celum terræ miscent: Item parasiti, quibus similiter ut suibus anima pro sale data videri potest: quod olim venustè dixit Cleanthes: qui omnes si à regis exsularent, rectius cum rebus humanis ageretur. Pictura poscit elephantē auerso capite & crispata promuscide fastidiosum: Suem contrà elephantō impudenter obsistētem, ac retracto rictu grun nitum mentientem.

### Emblema III.

EMBLEMA, nisi fallor ab Illustrissimo Cardinali Granuellano ANTONIO PERENOTTO usurpatum, elegans cum primis, & illustri laborum eius, virtutumq<sub>3</sub> heroicarum assecla, recteq<sub>3</sub> factorum comite Gloria dignissimum. Videtur autem heros ille, cum omni posteritate nominis sui memoriam qui adæquavit, innuere voluisse, ingentes, ne dicam perpetuos esse exantlandos labores, Herculis ritu, ei qui adspiceret ad amplissimum illud virtutis præmium, Gloriam videlicet; quæ concors est & consentiens bonorum rectè indicantium atque incorrupta laus, eaq<sub>3</sub> perennis; quæ cum vitæ breuitatem, tum inges laborum periculorumq<sub>3</sub> molestias, sempiterna posteritatis commemoratione solatur, hominibusq<sub>3</sub> per suos ve-  
luti



luti gradus ab humo in calum adscensum præbet : usqueadeò illa altissimi cuiusque & optimi animum notet diesq<sub>3</sub> exstimulat , accendit , atque concitat , ut per labores ad honestissimum illum veræ virtutis fructum , eundemq<sub>3</sub> immortalem pervadat : ( nimirum exsulat hinc popularis illa fama , adumbrata quædam illius imago. ) Sic ante Salaminem ipsam à mari obrutū iri hariolatur non falsus Cicero , quàm Salaminij tropæi , quod Themistocles erexerat , memoriam : priusq<sub>3</sub> Leuctra Bœotiae funditus interitura , quam Leuctricæ victoriæ , duce Epaminonda partæ gloriam. Neque verò huius loci est , aut temporis effusioribus habenis in istius heroïs labores , atque inde natam mox gloriam prouehi ; cùm singularibus ea commentariis debeantur. Pictura autem passim obuia est , ubi lionem , qui fodiat orbem terrarum , anguis mordicus suam caudam ore tenens circumplectitur : eumque ipsum serpentem laurea corolla medium ambit.

## Emblema. I I I I.

Carmen est Asclepiadeum monocolon , quale est illud Horatij :

Mecenas atavis edite regibus.

NATIVVM dissidium atq<sub>3</sub> internecium bellum esse Feli , cum fugace Murium gente , usqueadeo ut etiam cinere eius animalis diluto fugari abigiq<sub>3</sub> mures sit proditum , nemo est qui ignorat : nimirum à Natura doctam videmus , suspensis alto silentio vestigijs , occultoque speculatu , & certo caudæ quam vibrat libramine , in musculos exilire : ut nunc inanem ac superuacuum sim collocaturus operam , si in re clarissima disertus esse velim . Monet autem symbo-

lum, cuius meminit Suidas, nimia licentia & impunitate proposita insolescere homines. Metus supplicij scelerosos in officio continet: quo amoto aut negligentius obito, increfcit ferocia & sceleratè agendi libido. Verissimè dictum est in Miloniana, maximam illecebram esse peccandi, impunitatis spem. Pictura postulat geminas muscipulas, quibus inclusa sint feles, murium agmine liberè choreas circumquaque ducente.

Emblema. v.

NON hic de ea vigilia nobis sermo est, quam toto triennio passus fuisse legitur immortalis ille omnium scriptis Macenas, qui Somni molliciem nullis potuit libaminibus, nullis victimis flectere: sed de ea quæ Demosthenem coryphaum & principem oratorum fecit, qua antelucanas fabrorum operas prauertere magna cum ambitione consueuerat: Sed de ea qua Iulianus Imperator noctes dispartitus fuit in triplicia officia, quietis nimirum, Reipub. & Musarum: Sed de ea qua Alexander magnus subiecta brachio ænea concha, tinnitu complosæ peluis, ubi pilam argenteam manu tractatam remiserant nerui sopore laxati, euigilare solebat: Sed de ea quam reuera vitã vocat Plinius; quæ in ys precipuè viget, in quibus animus inquiet opere pascitur: id quod de te dici patiētibus auribus non abnues, Vigli vigilantissime, qua duce tot prouinciarum commodis assiduè inuigilasti hætenus non sine valetudinis dispendio: qua tot iam annis magna cum laude Præsidem consilij egisti, partaq; immortalis gloria tibi tuisq; eam facem praluxisti, cuius nunquam intermoriturus sit fulgor, eodē, quo orbis terrarum, termino inclusus. Proinde, qui veræ gloriæ amore ducimur, id nos ope summa contendere decet: ut & Reip. & in  
commune



*commune consulendo, testemur nos pluribus horis vixisse, & Somno temporis furi, aut (ut Ariston aiebat) publicano mediam vitæ partem interuertenti, portionem deduxisse. Frugi nanque temporis cum laude dispensatores, à morte etiam fax immortalis, veræ virtutis assecla gloria, nunquam extinguenda comitatur. Symbolum Viglij vulgatissimum pingendum erit, quo hinc liber explicitus diligentia, illinc clepsydra temporis parcè admetiendi argumento, atque horum in medio lychnuchus cum ardente face, posthumæ gloriæ testimonio, libitina imposita simul omnia exprimenda venient.*

## Emblema. VI.

Hexametrum est carmen cum Dactylico Simonideo, pentametro acatalectico, quale memoratur illud à Seruio Honorato:

*Parthenopæus erat puer Arcadiæ decus,*

*PAUSANIAS in Atticis scribit Athenis exstare Pacis simulachrum, Plutum filium gestantis: quod iterum repetit in Bæoticis, ingeniosè fabrefactum à Cephisodoto statuario scribens. Est autem Plutus siue Pluto diuitiarum deus: quanquam diuersissimos hos esse annotat Lilius Gyraldus, manifesti erroris conuietus vel ipso Pausania iudice: apud quem priore loco Πλούτων ἀπαῖδα legas: posteriore Πλούτων, eodē sensu. Siquidem Plutonem ideo præfecit diuitiis antiquitas, quòd ex imis terræ visceribus: imò ab ipsis inferis petantur opes. Non absimili ratione Thebis primaria Bæotiæ vrbe, Fortunæ statnam positam legimus apud eundem auctorem, Plutum puerum gestantis, innuere volente artifice, Fortunam matrem esse aut alumnam diuitiarum. Quod ad picturam attinet: Pax femina*

*E S pingitur*

pingitur nitido vultu, adsp̄ctu pulchra, oleagina corollā redimita, laua Amaltheæ cornu omni fructuum generē redundans, dextra Plutum puerum tenens, claro symbolo, quòd non è bello, sed beneficio pacis crescant opes. Plutus autem puer pingitur volucer, aureus totus, oculatus, teste Philostrato in Imaginibus: nam cæci Pluti significatio, ut ominosior, ab hoc loco excludenda est.

Emblema. VII.

PELECANVM, quem à rostri magnitudine *πέλας* *φίον* nominat auctor *κοίρα νίδων* anonymus, auem paludibus Aegypti peculiarem tradit, prolis suæ amantissimam, quæ pullorum suorum proteruiam atq; impietatem merita morte ulta, mox facti pœnitens, pertuso latere suo, pullos mortuos vitali sanguine, quo animantur, irrorat: quod ipsum præter Isidorum cōmemorat D. Hieronymus, non eadem tamen fide; quippe qui pullis à serpentibus enectis id officij præstari dicant, cū ille ad iniuriam parenti illatam hoc referat.

Nihil virum ingenuè literatum magis addecet; quàm citra omnem dissimulationem nihil occultum premere, quod vsui & commodo esse queat; ita se suasq; operas commodare, ut appareat effusum benignitatis sinum nulli, nisi prorsus à Gratiarum limine peregrinus ille sit, claudere velle. Callimachus Hecaten *φιλοξενίας ἀκλάνιστον σέβος* habuisse testatur: Cimonis Atheniensis ades Laciadis suis patuere: Musarum fores semper apertæ etiam prouerbio teste innotuerunt: Vir & litteris & humanitatis artibus imbutus, ut illic; ita hîc quod æmuletur gnauius, inuenit: ut nedum benignitate priuatim commodus sit; sed et officiis publicè, ut Reipub. literariæ, ut patriæ, ut amicis, ut  
ris



*viris bonis proſit. Is itaq<sup>3</sup> penetralia rimatur ſua, nihil abſcondit, ingenij dotes, quæ varias ad res à munificentiffimo bonorum largitore Deo unicuique tributa ſunt, non modo non ſupprimat, ſed claram in lucem proferat, totum ſe denique effundit. Talem te, Hoppere Iureconſultorum coryphæ, præſtas communi patriæ, talem amici agnoſcunt, talem te Reſpub. literaria ſenſit: & niſi concatenatorum laborum, otium illud Muſis ſacrum interpellantium, circulus, Principum curis inuoluiffet, locupletius ſentiret, immortalibus fecundiffimi ingenij fructibus fruitura. Picturæ ratio notior eſt, quàm ut in ea operam collocem explicanda.*

### Emblema. VIII.

*Carmen eſt Choriambicum Callimachium, conſtās tetrametro & amphibrachy ſive bacchio, quale eſt illud:  
Armipotens Mars genitor Romulida, te, veniis, precamur.*

*PASTINACA* iſ piſcis eſt, quem græci τεύχρα: interpretes plerique omnes Turturem perperam appellant: Hollandis noſtratibus, ab aculeata iaculi in modũ cauda, Pylſtaert nominatur. huius radius (aculeum ita vocat Plinius) tam letalem præſentaneiq<sup>3</sup> veneni vim habet, ut arboris quantumvis ramoſa, ac vegeta, & amœniſſimo frondium virore florentis caudici infixus, mox folia deſnuere faciat: quo amiſſo honore, truncus quoque celerrimè exareſcit, neque multò poſt ſiderata, atque è ſolis immenſo ardore, ſoliq<sup>3</sup> ſqualore exſiccata arbor fit ſimilis. Plinius lib. 9. cap. 48. & lib. 32. cap. 2. huiusce rei fidem facit, nullum uſquã exſecrabilius venenũ eſſe aſſerēs, quàm ſi radius in cauda paſtinacæ eminens, qui radici infixus arbores necet. hoc telo patrem Vlyſſem interemit Telegonus

gonus, accepto à Circe matre exitij indicio, quam rem graphicè describit Oppianus in *Haliuticis*, in hanc fermè sententiam utcunque versibus à me expressam.

Nil Trigonis diro radio exitialis usquam est:

*Martia non tela, aut nigri quæ lacte veneni*

*Spicula Achamenidum tinxit gens aspera bello,*

*Ubere stet quamvis foetu, & frondentibus arbos*

*Luxuriat ramis, vernoq; virescat honore;*

*Vulnere si tristi radicem punxeris imam,*

*Mox labat omnis honos, coma defluit, ipsa decorens*

*Exiit hinc viridem crudeli saucia tabe.*

Non minùs præsens virus habet exitialis ac pestifera delatoris lingua; quæ florentes dignitatibus euertere, fortunisq; omnibus exutos, ad incitas redigere potest.

Pingatur itaq; prius florens, eiusq; trunco affixa adhæreat pastinaca: sed ita ut radius ille, de quo diximus, caudici impressus clarè videri queat.

#### Emblema IX.

Carmen est Heroicum Archilochio tetrametro catalectico comitatum.

PLUTARCHVS in libro, quem de silentibus Pythiæ oraculis scripsit, commemorat Corinthi in Oeco (quod ædificium à Cypsello tyrāno consecratum fuerat) inter templi anathemata exstitisse Palmam æneam, cuius ad radices insculptæ visebantur rana & natrices, hydros vocant. Emblemate isto, tametsi ad diuersum sensum ibi torqueatur à Diogeniano, innuï existimo, à vitilitigatoribus (libèter enim Catoniana voce cum Plinio utor) obstreperis ac maledicis inuidorum linguis, exitiali veneno armatis, impeti illorum vitas, qui non obliqua, sed recta ratione ad dignitates rerumq; fastigia emergunt, dissimiles Ruffini,

Entropij



*Eutropij, eiusq<sup>3</sup> farina aliorum, prauis artibus diuitias & honores aucupantium: quorum conatus omnes eò tendunt, ut euersos fortunis omnibus exuant probos & innocentes homines, cùm isti innocentia sua freti, calumniatorũ latratus & inuidorum molimina sublimis faciliè despuant. Palma ardua, primæq<sup>3</sup> nobilitatis arbor est, onerũq<sup>3</sup> grauium victrix, frondibus nunquam vidua; quæ opibus honoribusq<sup>3</sup> pollentes aptissimè exprimit: cuius ad radices posita visuntur rana (quarum rauca illa & odiosa coaxatio nulli ignota, calumniatorum significationem haud dubiam habet) & hydri, nullis serpentium veneno inferiores, si Plinio credimus: per quos virulentus inuidorum alienam famam incessentium sibilus denotatur.*

## Emblema x.

*Logædicum Archilochium, Ithyphallicum Marius Plo-  
tius nominat, cuiusmodi est illud Flacci:*

*Soluitur acris hyems grata vice veris & fauoni,  
Trahuntq<sup>3</sup> siccas machine carinas.*

**PINGATUR** *Leo otiosè recubans in gramine non procul ab armẽto pascente, raptæ prædæ mordicus inhaerens: ita enim solet ex omni numero, quantumuis ingenti fame stimuletur, vnum pecus diripere comedendum: adstet illi Canis limis feram suspectans, & prædæ ingratæ (quod dicitur) oculis frustra deuorans. Symbolum optimè quadrat in hereditetas, qui alienis funeribus inhiãt, & per mortes incerta spe bona aliena captant, sæpius delusi, ut iuuenis ille apud Lucianum in dialogis, quem mors inopina ante senem cuius funeri propter summas opes imminebat rapuerat. Competit & in quosuis qui ambitu tenentur, & sacerdotia aut honores, alijs possessos venantur.*

## Emblema XI.

MEMORIAE proditum est à Diodoro Siculo Bibliotheca decimo septimo, & à Q. Curtio, Tyrios eximia religione coluisse Apollinem: cuius numen sibi tutelare ut propitiarent, sibi que modis omnibus conciliarent, tempore obsidionis, quam gravem & funestam ab Alexandro Magno experti sunt, simulachrum eius Dei aurea catena basi columna, cui insistebat alligasse, ut ille scribit; aut ut alter, ara Herculis vinculum illud inseruisse, velut illo Deo Apollinem retenturos. Similiter Pausanias in Laconicis refert, perneustum Sparta exstare simulachrum Martis compedibus irretiti, quo vinculo proprium sibi ac Reipubl. perpetuum bellatorem illum Deum, nec unquam suae urbis desertorem futurum, velut in peculio obligatum, voluerunt. Neque aliorum Victoriā deam, cui penas dedit, volucrem que finxit antiquitas, ἀνέρον, inuolucrum, alisque orbam & fano & statua decorarunt Athenienses, augurantes perennem ipsis fore Deae praesentiam, negatis illi alis quibus auolaret. Gentilitatis delirae somnium istud fuit, nimis quam superstitiosum, existimantis quali quali honoris obsequiique lenocinio, Deum in vota nostra, eaque perfunctoria & inutilia pellici, ad modum pueritiae, quae crepundiis deliniri capiisque solet; atque ita in ordinem cogi posse. Quare stultum est, ne dicam impium ac profanum putare diuinum numen toti mortalitati inuandae comparatum, tam pusillum esse & otiosum, ut palpationibus tantum non nostris ac veluti poppysmis titillationibusque cedat et expugnetur. Pingantur tres isti dii seorsum in templis cōcameratis, Apollo catena aurea columna alligatus: cetera peculiaria indicia Fulgentius & Cornutus



nutus ista tradunt, nempe ut pingatur iuuenis, imber-  
bis, capillo promisso aureoq<sup>ue</sup>, laureo ferto redimitus, cū  
arcu & sagittis in dextra, citharam tenens leua, cum  
Coruo ane illi sacra adstante. Mars sit compedibus  
vinctus, alioqui loricatus, galeatus, pugione accinctus,  
flagellum manu tenens, ut Albericus philosophus scri-  
bit, altera clypeum, nudo pectore, ut Isidoro placet,  
cum lupo animali ipsi sacro, aut gallo, secundum alios.  
Victoria, quā apteron, id est, inuolucrum dixerunt  
Athenienses, pingatur sine alis, virago ut solet dextra  
manu punicum malum tenens, leua cassidē: nam hac  
specie colebatur Athenis, ut Heliodori testimonio con-  
firmat Harpocratio: posteri deinde sculptores alas  
illi iunxerunt, nimirum Bubali pater Anthermus,  
aut, uti Aristophanis scholiastes vult, Aglaophon  
Thasius pictor; quam alis aureis ornat Comicus Ari-  
stophanes illo versiculo:

Αὐλὶκα πέταλαί τιν' ἀεζύριον χρυσάιν.

Mox aureis pennis volat Victoria. Exstitit & Romæ  
simulacrum Victoria alis viduum, quæ cælitus tactæ  
defluxerant; in quod Pompeij titulo epigramma legi-  
tur, in hanc sententiam:

Roma caput rerum, nunquam tua gloria obibit:

Nam victrix Dea te haud deseret inuolucris.

#### Emblema XII.

Carmen est hexametrum, cui associatur Alcmanium con-  
stans trimetro brachycatalectico, ut est illud:

Σπέρνεις decorάε virginis toros.

SPARTÆ in templo Veneris armata contigna-  
tionem fuisse extructam, quæ Veneris cognomento  
Morphūs, à forma (ut apparet) dictæ, numini fue-  
rat sacrata, memorat in Laconicis Pausanias: simu-  
lacrum erat ex cedro factum, sedentis habitu, compe-  
dibus

*dibus vinctæ, caput obnubente flammeo, siue calyptra: addit Tyndareum Dioscurorum patrem pedicas illas adiungi curauisse, fidei symbolo, quam maritis deberent uxores arctissimam: tametsi illius infelicitas in filiabus prostituta pudicitie macula famosis, à Stesichoro Lyrico prodita, satisq; decantata est. Porro com pedes indissolubilis vinculi coniugalis, & arctissimi amoris significationem habent. Flammeum verò (quod luteum est capitis velamentum) & pudoris argumento capiti imponitur, & fausti ominis ergò, ceu connubij indissolubilis. Illud de pudore declarat Claudianus in raptu Proserpina, ibi:*

*Flammea sollicitum prævelatura pudorem.*

*& Lucanus Pharsalidos lib. 2*

*Non timidum nuptæ leuiter tectura pudorem*

*Lutea demissos velarunt flammea vultus.*

*Postremum confirmat flammei vsus assiduus flaminis uxori, cui diuortium facere nulla ratione leges permittebant. Sedens autem meritò pingitur, vagæ Veneris odium insinuas. Pingatur Venus subsellio insidens, pedicis constricta, vultu flammeo obtecto, nuda, dextra Cupidinem videntem complexa, sinistra tria mala aurea ferens: adstent illi geminae columbæ aues illi sacrae: Cornuto teste cùm propter puritatem, tum propter illices blanditias, quarum indicium facit frequens harum auium suauitatio: nihil autem magis decere honestam matronam, quàm velatam conspici, vult D. Clemens Alexandrinus, exemplo Crensaë uxoris Aeneæ, quæ ardente iam patria non dum abiecerat curam velaminis.*



Carmen est Sapphicum præpositum Glyconio, quale illud

Boëtij:

Cum polo Phæbus roseis quadrigis

Lucem spargere cæperit.

SYNESIUS libro de regno administrando ad Arcadium, vel, uti Nicephorus vult, ad Theodosium iuniorem scripto, negans in viribus solis positam esse felicitatem principis, eam prædicat esse absolutam omnibus numeris vitam, quæ potentiam prudentiæ conciat: quæ res coniunctæ robur inexpugnabile conciant; disiunctæ verò inualidum & inutile: quando videlicet aut robur prudentia sit destitutū, aut prudentia viribus defecta. Quapropter, inquit, sapientes Aegyptios in hoc sum admiratus frequenter, qui geminum Mercurij simulacrum simul cōstituunt; alterum iuuenta florentis, alterum maturo senio venerandi: volentes innuere, eum, qui rectè Rempub. aut regnum sit administraturus, coniunctam cum prudentia fortitudinem habere debere, quasi alterutrum inutile sit absque alterius ope. Neque alia de causa Sphinx apud illos pro templorum foribus posita visitur, & quæ sequuntur infra XLII emblemate recitata. Huc spectat Hor. illud: lib. 3. Ode 4.

Vis consilij expers mole ruit sua.

Vim temperatam Di quoque prouehunt

In maius: idem odere vires

Omne nefas animo mouentes.

Eandem sententiam comprobat Isocrates ad Demonicum scribens. Robur cum prudentia coniunctum prodest, quæ sine plus habenti incommodat. Quod ipsum & Milonis Crotoniatæ exitus abundè docuit.

Emblema XIII.

Hexametrum versum sequitur Aristophanium metrum



tetrametro brachycatalectico absolutum; seu tetrametrum Colurum: ita namque à Mario Plotio, cuius libellum de metris aliquādo inuulgabimus, nominatur, quale est illud:

*Marcent lucernæ, sol propinquat, non tamen vocas.*

**PYRAMIDES**, quas otiosam ac stultam regum Aegyptiorum pecuniæ ostentationem nominat Plinius, vastæ fuerunt & insana substructionum moles, aliquot soli iugera complexæ, partibus fermè quatuor angulorum lateribus ab imo in acumen desinentes, sic dictæ, quòd in ignis speciem, in conum extenuentur; quarum fastigiata excelsitas paullatim gracilescens, umbras quoque consumit, ut præter Solinum, Ammianus scribit lib. 22. Fuisse eas regum Aegypti monumenta, & inter septem orbis miracula habitas tradit geographus Strabo. Quia verò inconcussa vel maximè, stabilissimaq; inter omnes figuras figura quadrangula, Galeno teste, habetur, hinc est quod monarcharum aut regum fortunas huic comparari appositè credam: aut etiam constantis animi virum; qualem describit Q. Catulum Cicero, quem neque periculi tempestas, neq; honoris aura potuit unquam de suo cursu, aut spe, aut metu dimouere. Priori rationi hedera aptè conuenit, utpote sese ipsa sustinere prorsumq; serpere impotens, ni pedamenti adminiculo utatur, ac flagellis suam muniat imbecillitatem. talis est plebis ac minoris conditionis hominum status; quibus principum opes fulcramento sunt & ornamento. Neq; posteriori rationi absonus est viuax & perennis huius planta viror: quippe cum magnanimi et fortis viri, qui humana omnia premit, & ad omnes casus infractum gerit animum, laus cum aternitate certet, perpetuò victura. Diuersa planè hinc ratio est hederae arborem scandentis, ut quæ  
solet



folet succū viresq<sub>3</sub> illius omnes in se rapere ac demum enecare: quod in eos quadrat qui alienas opes sub titulo & prætextu patrocini in se corriuant, atq<sub>3</sub> emungunt. Aliter etiam Marcellinus lib. 15. hederae comparationem ad opulentos transtulit, apud Imperatores delatos, qui præsidia potiorum pulsabant, ysdemq<sub>3</sub> tanquam hederae excelsis arboribus adherentes, absolutionem precibus mercabantur. Sunt qui emblematis huius significationem calumniati, ad creandam principi cuidam viro, qui hoc symbolo utitur, inuidiam, eius sensum aliò detorserunt, velut qui circumfessum tenuerit Galliarum Regem & hederae instar circumplicatum, ne quis ad eum pateret aditus sine ipsius assensu. Sed istud quid aliud est, quàm genuinum emblematis sensum corrumpere, atq<sub>3</sub> pervertere, & animam illi adimere.

## Emblema xv.

Heroicum cum Iambico trimetro.

VPVPA avis est cristata, plumis in capite instar cristæ plicatilis subrectis, quā Galli, vñ hupe appellant. Hanc scribit Orus, ubi senserit ex vuarum, quas appetit summopere, esu nimio noxam se incurrisse, decerpta adianto herba, quam officina capillum Veneris nūcupant, mederi sibi, ramulumq<sub>3</sub> eius herbae ore circumferentem, obambulare. Quibus temulentia valetudinem concussit atque labefactavit, ij abstinentiæ ramulo se lustrent. Qui affectibus violentis tyrannis, aut (ut voluit Plato) loris restibusve nos ultro citroque in diversos motus trahentibus, obnoxij sunt, ij à diuinis placitis & verbo diuino remedium petant, & mentē, quæ passionibus illis animi turbidis tanquam regina quæpiam imperare debet, obmuniunt: quæ

*Victoria primaria est & potissima, seipsum vincere.  
Qui peccata sua ritè expiari cupiunt, lustrent se la-  
chrymarum adspergine & immersabili poenitudi-  
nis ramulo.*

## Emblema XVI.

Metrum hexametrum, cui subiungitur dactylicum Stesicho-  
rium, à Stesichoro, cui familiare fuit, nomen sorti-  
tum, constans pentimetro acatalectico, quale est illud à  
Mario honorato recensitum:

*Marsya cede Deo, tua carmina flebis.*

PINGATUR puerorum grex geminus, quorum  
altera pars bullas sine pompholygas è conchylio (in quo  
smegma, quem saponem dicimus, cum momento aqua  
commistum sit) in aëra difflet: altera easdem iridis in  
modum discolores & purpurascens sectetur atque  
comprehendere studeat, sub quorum pedibus non ma-  
lè subscribi possit diuerbium illud Italis in ore frequēs,  
ET TV TO ABBRACCIO ET NVL-  
LA STRINGO. Nemo nescit bulla nihil esse vanius  
aut inanius, comparata illi iam olim caducea morta-  
litas umbra. Itaque quadrabit aptissimè in eos qui  
diuersis artibus scientijs ue animū adijciunt simul, va-  
ria in studia distracti: aut qui pluribus muniis hono-  
ribusq; simul inhiant: aut quacunque tandem in re  
insatiabili animo nusquam satisfacientes huc illuc nu-  
tant. hi namque parum proficiunt, suaq; spe elusi saepe-  
numero discedunt.

## Emblema. XVII.

HIPPOPOTAMI impietatem immanem esse,  
monumētis litterarum proditum est à veteribus; adeò  
ut ne patri quidem, per quem vitæ usuram accepit,  
parcat: qua de re etiam alibi scripsi. At ciconiam ser-  
pentium certissimum esse exitium nemo infitias inuit,  
qui



qui eam longis colubris inuisam dici Virgilio didicerit: qua de caussa necasse ciconiam capitalis noxia fuit apud Thessalos, quòd eorum regio prouentu serpentium abundaret, si Plinio credimus. Sceptrum verò gestamen Regum, qui priscis seculis indices erāt causarum; ac proinde etiam iustitia dicatum fuit. Quo symbolo indicatur impietatem ( quæ vitiorū omnium fundamentum est, & qua flagitia ac scelera omnia continentur) coërcendam esse & vindice gladio castigandam, atque è medio tollendam, non secus quàm à ciconiis solet serpentium genus. Res per se clara est. Equo fluniatili in dorso erigatur sceptrum, cui ciconia insistat.

## Emblema. XVIII.

Metrum est Archilochium acatalecticum, comitatū Iambico Hipponactio, cuiusmodi est illud Flacci:

Non ebur, neque aureum

Mea renidet in domo lacunar.

MUSTELAM (inquit Plutarchus libro de Iside & Osiri) plerique arbitrantur & affirmant per aurem initum pati atque concipere, sed ore partum edere, natalium sermonis quadam similitudine. Anaxagoras, aliq, nonnulli physici prodiderunt Mustelam pariter & Ibin ore parere; teste Aristotele libro de generatione animalium tertio, cap. 6. quorum sententiam illic conuellit. Aristeeas ut istud ipsum confirmat; ita paululum detorquet symboli explicationē. sic enim sonant eius verba. Mustela auribus concipit, quod ore parturit: itaque eius esu interdictum est Levit. II. Iudais; ut hoc symbolo insinueretur, perniciosissimū esse homini morem, quòd, quæ auribus acceperit, eadem verbis exaggerans maioribus malis inuoluat.

*Hugo Card. in superiorem Leuitici locū euariat non-nihil à prædicta opinione; siquidem mustelam marem ore generare, feminam, aure concipere annotat. quàm fideliter, ipse viderit. Orus etiam mustelum piscē huius cognominem ore parere scribit: similiter & Zelex.*

*Huc allusum videtur à Lycophrone in Alexandra te-nebrosissimo poëmate, cum Medusam Gorgonem ap-pellat. δειρότατα γὰρ id est, Mustelam ingulpa-ram, velut colopuerperam, propter fabulam, quæ fin-git Grysaorem & Pegasum è ceruice eius exstitisse, truncato illius capite. Ad symbolum faciunt Epicte-ti verba admonentis à natura mortalibus unicam da-tam esse linguam, aures geminas; ut loquendis auditæ duplo sint plura. Demonactis apud Lucianum docu-mentum est, auribus sapius quàm lingua vtendum. Epaminondas à Pindaro laudatur hoc nomine, quòd haud facile alter inueniretur, qui plura sciret ac pau-ciora loqueretur. Picturæ ratio per se euidens est.*

### Emblema XIX.

*Alcmanium est dactylicum tetrametrum hypercatalecti-cum, simile secundo Boëtij carmini, cuius initium:  
Heu quàm præcipiti mersa profundo.*

**CROCODILVS**, cui à croci metu nomen est, exitiale malum, quadrupes, utroq; elemento infestum & terra & flumine, linguæ expers, dentibus serratis eorumq; ordine peëtinatim se stipante, maxilla infe-riore immobili, unguibus immanibus, cute adeò inui-cta ut ictus tormento quouis adactos eludat atq; re-percutiat tergore, metatur locum nido prædiuinatione quadā & naturali prouidentia cum deligēs, ad quem summus Nili auctus eo anno sit accessurus: neq; alibi incubat oua, quæ cādida sunt anserinis similia. hac de

Cro-



*Crocodilo ex Plinio lib. 8. ca. 25. Solino cap. 45. Marcellino lib. 22. & Herodoti Enterpe. Addit Plutarchus libro de Iside, Aegyptios certum conijcere Nilī incrementi terminum ibi fore, ubi ona exclusit femina: nam cum in humido fouere nequeāt Crocodili, & procul à fluminis alueo parere metuant, ita exactē presentiunt natura tacito instinctu quod futurum est, ut accessu fluij in pariendo, incubandoq; (quod alternis obseruant mas & femina) utantur, atque ita ona arida & inhumecta conseruent. Monemur prudenter rerum satagere, longeq; antè consultare atque videre, quàm quid statuamus aut agamus.*

Emblema xx.

*Carmen est Phalecium à Phaleco inuētore sic nūcupatum, quod & hendecasyllabum à syllabarum numero, quale illud Martial,*

*Vitam quæ faciunt beatiorē.*

*CICADA insectum est, quod rorem lambēdo uiuit, nec alterius alimonia indigum, cantu se oblectat. Pingi possunt plures cicada, quæ flosculos (qui ad ornatum varij pingātur) dehiscētes, & explicitos, rore madidos, aduolitent ac depascant; à ceteris, qui etiānum intra calyces suos siue alabastros abditi latent, abstinēant. Qui sua sorte, licet exigua, contenti sunt, bonis presentibus fruuntur: liberali interim spe ducti, fore, ut aut industria aliquid adiiciat, aut principum liberalitate accedat, aut hereditas portum ostendat, quod omne lucro deputant, & veluti probè sibi feneratum prætereunt. Non dissonum hinc est Italicum hendecasyllabum.*

*Di questo mi contento & meglio spero.*

INSIGNIUM usus peruetustus est, quando Anubin & Macedona, Osiridis filios, armorum insignibus usos fuisse iam tum memoria prodidit Diodorus, canis exuuium alterum, lupi rostro alterum tanquam animalibus ab ipsorum natura non alienis. sic Tydeus apud Æschylum in clypeo depictum præfert calum stellatum, cum luna medium umbram occupante: Hippomedon Typhonem fumos ore efflantem: Parthenopaus Sphingem: Perseus Gorgonis colubriferum caput; Veneris genetricis Iulius, alij Pegasos, Minotauros, Harpyias, Leones, Vrsos, Aquilas, Angues, Fuscinas, alius aliud. At gentis tuæ istud insigne aut symbolum, Sambuce doctissime, non otiosum ac iners aut inglorium existimo, in quo visuntur binæ grues (non sine causa Palamedis, unius inter omnes Græcos solertissimi artium insignium inuentoris, aues nuncupatæ) hinc pedibus saxum, firmitatis argumento, illinc cor, fontem & retinaculum omnium honestarum actionum, concorditer complexæ, rostrisq; annulum aureum, ceu debitam sibi mercedem appetentes. Multiplex hinc cognitio animum simul præstringit: nam uti Grues altiuolæ sunt, nubila volatu tranantes; ita doctissimus quisque non humo assidet, sed mente caelestes etiam sedes adit, imò penetrat; neque id solum, verum etiam gloria eternitatis affectatrice, sidera pulsant, et nubibus caput inserit. Eadem etiam vigiles, quod noctu lapidem pede sustinent, ut oppressas somno, laxatis nervis, strepitus cadentis lapidis expergeficiat, diligentiae summæ indicium faciunt. Quam istarum auium sollertiam in exemplum rapuisse mihi videtur Alexander Macedo non abs re Magni nomen adeptus, qui globum argenteum brachio capiti subdito tantisper continebat (quoties lucubran-



cubrandum illi erat ) dum remisso nervorum tenore delapsus, tinnitu pelvis subiectæ, somnum illi abruptisset. Annulus verò ( quem Promethei inuentum perperam, ut quo ipse Caucasò alligatus fuerit, alij Lacedæmonijs falsò attribuunt, quòd ferreus illis in usu fuisse legatur ) in se recurrens & ἀπειρών, immortalitatis nunquam ullo sæculorum spatio finiendæ index esse meo quidem iudicio videtur. Quòd si hariolari in re mihi obscura licebit, crediderim duorum coniunctissimorum fratrum operam præclaram Principi aliquando suo nauatam, maxima constantia pariq; concordia, ista genti tuæ peperisse insignia, laudabili cœratione, quàm cicatricum insignia Sallustianus ille commendavit, ut, quibus gloriæ infinitas, annuli opes, adamantis argumento à Principis liberalitate honestamentum ac decus accesserint. Effigiationem quid attingat præscribere, cum per se ipsa è superioribus abunde elucescat.

## Emblema. XXII.

Carmen est Heroicum cum dactylico Almanio tetrametro acatalectico, cuiusmodi est illud Boëtij:

Tunc me discussa liquerunt nocte tenebræ

Luminibusq; prior redijt vigor.

ORVS Apollo qui Hieroglyphica scripsit, refert Leonem, ubi febricitavit ( familiaris autem huic feræ morbus febris est, præsertim quartana, si Phileti, qui de animantibus græcè scripsit carmine, credendum est ) simia solere vesci, saluberrimæ escæ loco. Non repugnat Plinius, nisi quod morbi vim eleuans, egritudinem fastidij tātum sentire dicit, in qua medetur sibi, gustato simiarum sanguine, quæ lasciuia immodica in

rabiem eum agunt. Confirmat idem & Philostratus lib. de vita Apollonij tertio : Leones medicinae gratia simiis insidiari scribens. Quin & Aelianus omnigenae historiae lib. 1. cap. 9. agrotanti leoni cetera remedia inutilia scribit, praeter simiam, cuius esu pristinae valetudinem recuperet. Idem in libris de animalibus lib. 5. cap. 39. medela ratione & morbi discrimen distinctius his ferè verbis aperit, Leo, inquit, supra modum ingurgitato cibo, remedium querit, aut à quiete abstinenciaq, aut simiã nactus deuorat: quo cibo alui proluuium excitatur, molestaq, saburra exoneratur. Simiis aptissime comparari possunt impostores, assentatores, & parasiti, qui ad gratiã loquuntur, & principum auribus insidias faciunt: siquidem ὀνομαστικός velut populares Simias vocat Aristophanes eos, qui plebi assentantur & obsecundant, quando ὀνομαστικός est, quod Simiari notat, pro fallere graeca lingua usurpat: est enim animal istud ad imitandũ omnia dextrum, & habile. Tales autem peñtes si quis aula exturbaret princeps, na ille verè Augia stabulum repurgaret, & cum Hercule ac Constantino monstrorum domitor dici posset: hoc enim Aurelius Victor Constantino tribuit, qui aulicas illas pernicies, tineas soricesq, palatii appellare solebat, ut Anaxilaus opum vermes, quibus confectis & expulsis, ad incolumitatem rerum & sanitatem cuncta redire posse, non iniqua spes est.

## Emblema XXIII.

Cyrillium metrum est, constans pentimetro hypercatalectico, quale hoc:

Pulchra puella comas ambit sibi palmitibus.

H A C



**PALMA** *Aegyptia* Theophrasto à fructu *Balanus* dicta, arbor est magna, non recta, sed contorta folio myrto simili: Dioscoridi (à quo pictura peti potest, expresso eius uno ramo) *ωῶμα*, à succi copia qui in poculi vicem conuertitur, & ab arcenda siti adipsos quoq<sup>3</sup> vocata. Hæc priusquam maturuerit decerpta, sitim sedat: sin matura sumatur, sensum intercipit, gressum præpedit, linguam retardat, & obsessis mentis ac corporis officiis, ebrietatis vitium imitatur, ut Solinus memorat cap. 45. Memorabilem. Admonet hoc symbolum curiosam & profundam diuinarum rerum investigationem, eamq<sup>3</sup> maturis iam fructibus factam, hoc est, ab ijs qui mysteriorum omnium cognitionem absolutam se adeptos putant, periculosam esse: nam quo altius isti laborant arcana de Deo eiusque uniformi Trinitate perscrutari, hoc maioribus altioribusq<sup>3</sup> tenebris inuoluuntur, & in diuinitatis abyssum inelutabilem corruunt. Simonides sapientiæ nomine percelebris olim, rogatus ab Hierone Syracusarum rege, Deum ut sibi definiret, poposcit sibi diem unum: postridie rogatus ut fidem exsolueret, bidui spatium petijt: cumq<sup>3</sup> sæpius dierum numerum ingeminaret, atque Hieron admirabundus eius facti rationem requireret, respondit sibi tanto intricatiorem obscurioremq<sup>3</sup> videri rem, quanto diutius consideraret. Quò spectasse Aegyptios sacerdotes puto, qui sonum tantum vocalium litterarum inconditum accinebant, indicantes se nulla ratione de Deo certi quid & explorati posse expromere. In hanc sententiam detorsit istud symbolum Hugo Eterianus, non postrema eruditionis Theologus, cum de Spiritu sancto aduersus Græcos disserturus sic initio operis loquitur. Dum suprema philosophia prin-

cipium



*cipium delibare aggredior, aquatica mihi videor te-  
studini esse similis, quæ fratum tranare cupiat: stupore  
cogitatus obsidetur; mens tabescit; lingua tan-  
quam Aegyptiam palmam, quæ apud Græcos Adipfos  
(malè enim adiperos ibi legitur) vocatur, gustauerit,  
retardatur. Appositè me hercule symbolo usum vides,  
in explicanda prouincia, quam arduam aggrediebatur,  
difficultate: nam diuina natura ne angelicis quidem,  
nedum humanis linguis enarrabilis est, aut comprehensibilis,  
ut D. Martialis Lemouicensis Episc. scribit in epist. ad Burdeg. quod ipsum & Plato non tacuit,  
Deum indictum & innominatum vocans, quem inuenisse  
haud sit facile; intellectu comprehendere, impossibile:  
aut, ut Hermes Trismegistus inquit, Deum mente cõplecti res est  
ardua, sed sermone enunciare, impossibile. Huc spectat Iambus antiquissimus,  
quem ex ore Socratis fluxisse, lib. de recta Confess. memorat  
Iustinus martyr.*

*Οὐδ' ἐν γὰρ ἀνθρώποις τὸ θεῶν σαφές. id est,  
Rerum diuinarum nihil mortalibus exploratum est:  
quo innuitur, qualia sint diuina, non esse inquirendum  
scrupulosius. Præstat itaque immaturas palmulas decerpere  
in sacra philosophia, quæ sitim arcent: quippe cum videamus  
sophos istos qui maturis frui se solos arbitrantur, arentibus  
faucibus, lingua impedita, ingenio hebescente ac caliginoso,  
gressuq; malè nutabundo, in ea sursum ac deorsum iactari  
volutariq;: & sapientem Athanasij admonitionem sequamur,  
docentis, lib. 3. aduers. Arrianos, curiosa & accurata  
persuasione potiore esse fidem simplicem. Potest symbolum  
referri & ad captiosas spinosasq; disciplinas, quæ cū fructu  
delibari possunt primoribus (quod dicitur)*



tur) labijs; ita namque sitim restinguere valent: in quibus tanquam ad Sirenaos scopulos desiderare atque consenes- cere, id demum insanum est studium: nam ubi eò res ve- nerit, stupidi, cæci, dulcique veneno ebrij, argutiarum fu- liginè audientium oculos præstringere gaudent, sed euani- da, sanctissimæq; disciplinæ nomen ementiuntur interim, ut luculentè differit Herodes Atticus apud Gellium, lib. 1. Neque malè vita aulica, huic Adipso arbori comparari possit, quam aliquantisper sequi & degu- stasse ante maturitatem fuerit non utile, sed cuius illi- ce succo, ubi maturuerit, plenis faucibus imbui, in eâ- que non immorari tantum, sed & immori, omnem nostri agnitionem obliterat, mentem sanam exulce- rat, fastu inflat, & Pallante (quem liberos suos nun- quam alloquio dignatum scribit Tacitus lib. 13.) in- solentiores reddit: nam ex infinitis vix unum illic Eutherium inuenias, quem in Constantij Imperatoris comitatu solum integrum, fidei continentiaq; cultor- em exstitisse, Marcellinus commemorat, lib. 16. A superiore, quam primo loco dixi, ratione non abludit fortasse, quod refert Clemens Alexandrinus in Aegy- ptiorum sacrorum ceremonijs, post cātorem, qui prin- cipem locum obtinet, sequi Horoscopum flaminem, qui altera manu Horologium, altera Palmam symbo- la gerebat.

## Emblema XXIII.

Carmē est hexametrum cum trimetro senariòve Iambico.

PRODITVM est à Plutarcho libro de Iside, Phi- diam clarissimi nominis statuarium, finxisse Palladis simulacrum, pedibus prementis Draconem; & alte- rum Veneris apud Elæos, pede calcantis testudinem: argumento in illa custodia sui, quæ virginem deceat;

in hac silentij curaꝗ rei domestica, quæ matronã deceant. Draco autem appositæ Palladis (quam perpetuæ virginitatis honore insigniuerunt poëta) pedibus substernitur, ut sedulam pudicitia, cui mille tenduntur insidiæ, curam virgini incumbere significetur; siquidem acerrima oculorum acie præstare Draco perhibetur: quo nomine thesauris omnibus custodiendis (inter quos aureo velleri, hortisꝗ Hesperidum) eius operam assignauit antiquitas. Pingitur autem Minerva virginis specie, oculis acribus & glaucis, hastam dextra, clypeũ læua tenens: cuius umbo Gorgonis anguicomæ caput præfert, veste ad talos usque demissa, galea caput muniente, subiecto pedibus Dracone, cuius caput hastam attingat. ita enim ferè à Pausania in Atticis, & à Cornuto depingitur. Venus nuda pingatur, serto myrteo redimita intercurrētibus rosis, casto, hoc est, balthæo vario & pulcherrimo infra pectus ambiente, dextra tenēs tria mala aurea, læua columbam, pedibus testudinem calcans. Symbolicè nuditate simplicitatem et apertũ pectus uxoris demonstrari existimo: per columbam puritatem & blanditias: per aurea mala, casti amoris illicium: per castum, conjunctionem deuinctionemꝗ animorum: per testudinem, & silentium & anxiam rei familiaris curam, quippe cùm summo silentio ingrediatur testudo, domumꝗ suam semper secum circũferat, unde domiportam dixi, ex Cicerone libro de diuinatione secundo, ubi veteris poëta versum cõmemorat, enigmaticè testudinem circumscribentis, Terrigenam, herbigradam, domiportam, sanguine cassam.

Emblema xxv.

HÆC germana est et vna medici Icon, quæ quia pro-



propter concisam breuitatem ob scurior est & intricatior, libuit eam per dialogismū reddere prolixius pluribus versibus, ut explicatiū singula paterent.

*Qui Deus es? Phœbo satus atque Coronide. habes cur Sceptrum? agris ut rex impero. quid resides?*

*Sit sedato animo medicus. quid verticem inumbrat Laurea? perpes enim viuit ab arte decus.*

*Nodoso baculo quid nitere? difficilem artem*

*Id notat. hinc cur stat Gallus, & inde Draco?*

*Cura vigil medicum decet ac custodia. quid vult*

*Sub pedibus Canis? hoc symbolon est fidei.*

*Quid ue tegit mentum propexa incanaq<sub>3</sub> barba?*

*Longa etas firmat iudicium atque fidem.*

Aesculapius Apollinis ex nymp<sup>ha</sup> Coronide filius, in deorum numerum olim receptus fuit, quoniam rudem adhuc & vulgarem medicine scientiam paullo subtilius excoluisset, ut Cornelius Cels. ait: quanquā Trismegistus, interprete Apuleio, medicine repertorem falso nominat. Huius simulacrum varijs modis effigiauit antiquitas: nam apud Sicyonios imberbem stetisse altera manu sceptrum; altera pineam nucem obtinentem, memorat in Corinthiacis Pausanias. in eadem historia refert à Trasymede Pario exsculptum fuisse Aesculapium in solio sedentem, baculum tenentem manu, altera caput Draconis mulcentem, cum accubante cane. Consentit in multis & Festus Pompeius, lauream insuper illi attribuens. Ego collectis symbolis omnibus, & quasi in vnam (quod dicitur) myconum coniectis, talem fermè medici siue Aesculapij iconem conlavi. Virum grauem pinxero, barbatum, throno insidentem, laureatum, sceptrum gerentem altera manu, nodosum baculum altera, adstantes illi  
hinc



hinc Draconem, hinc gallum, stratumq; ad pedes canem. Nunc commenti, symboliue rationes subiiciam. Aesculapij nomen haud temerè in medicum competit, quippe cuius sit placidè curare egrotos. id quod Græcis sonat vocis etymon ἰατρίῃς ἡ πένος. Barba illi datur velut adultæ & longæ multarum rerum experientiæ argumentum. Seditis imago denotat, sedato animo, neque vagum esse debere: Lauream coronatum existimo, ob eximium & immortale ex arte salutare decus. quanquam Festus eò referat, quod laurus arbor sit plurimorum remediorum. Sceptrum illi cum Pausania tribuo, ut dignitas medici eo representetur, qui regis in morem agris imperare debet: quo spectat inuectiua Galeni, libro primo Therapeutices, medicos sui temporis incusantis, quod mancipiorum ritu agris subseruirent ac obsecundarent, contra maiorum ab Aesculapio oriundorum morem, qui velut reges subditis, & veluti duces militibus, præscribebant egrotis quæ fieri vellent. Bacillum nodosum tribuit illi antiquitas, ut difficultatem significarent artis plurimis rerum discendarum anfractibus nodisq; difficilibus inuolutæ: tametsi Eusebius hoc interpretetur egrotorum sustentaculum: & Cornutus libro de natura Deorum, quod medici opera confirmemur, ne tam propere in morbos incidamus: Draconem assistentem dant omnes. Cornutus tum propter diligentiam in curandis agris insomnem, tum quod medici industria egri à morbis veluti reuiuuescant, seniumq; deponant, serpentium more, vnde Macrobius lib. 1. Saturnal. Aesculapij & Salutis simulacris Draco, inquit, subiungitur, quia præstant ut humana corpora, velut infirmitatis pelle deposita, in pristinum reuiuiescant vigorem. Præterea constat ædium sacrarum, adytorum, oraculorum & thesaurorum custodiam olim Draconibus assignatam fuisse, cum quia acutissimè cernant,



gerant, tum propter inuictas vigilias, quod sensit & Fest. at Plin. lib. 29. cap. 4. Draconem Æsculapio sacrum voluit, propter remediorum, quæ illi insunt, multitudinem. Gallus eidem adiungitur, quod vigilantissimum sit animal: nam sollicitum & vigilantem medicum requirunt res egroti. Canem illi subycio, ut animal fidissimum. quid autem medicum magis deceat, quàm indubitata fidem integritatemq; egrotis seruare? quæ res Philippum Acarnanem Alexandro commendatum habuit, licet parricidij crimine, sed immerito perstrictum. neque enim placet quod Festus ait, ideo adhiberi canem, quod canino lacte sit enutritus. quod tamen apud Lactantium etiã legitur.

## Emblema xxvi.

Heroicum præcedit Archilochium dactylicum dimetrum hypercatalecticum, cuius generis est illa Horatij oda.

Diffugere nives, redeunt iam gramina campis,  
Arboribusque comæ.

IN nemine Deorum tam prodiga ingeniorum fuit antiquitas, quàm in Fortuna, ut quæ sola utramque paginam facere in ratione mortalium fuerit credita. Hinc tot eius cognomina, de quibus alij dixerunt, tot pictura, tot diuersa simulacra; apud Artemidorum libro de insomnijs secundo, Cylindro tereti insistentis: apud Pausaniam in Messenijs polum vertice sustinentis: apud eundem Cornu Amalthææ gestantis, præsentem alato Cupidine: apud Ceбетem & Eusebium in pila sedentis & alata: apud Lactantium lib. 3. Copiæ cornu præferentis cum gubernaculo: apud Plutarchum viscata: ita fortuna varietatis amica, etiam variè expressa est. Hanc Smyrna clarissima Asiæ ciuitas pedibus carentem exsculpsit, instabilitatis argumento; un-

*de iocus Apellis in Fortunam diuersa ratione sedētem  
à se effictam, dicentis eam nunquam stetisse: Alatam  
verò eadem Smyrna sculpsit, ut vagam nulliq<sup>3</sup> perpe-  
tuò addictam. Pingatur itaque sine pedibus, manum  
extensam ita porrigens, ut pennas suas comprehendere  
non sinat.*

### Emblema xxvii.

Heroicum est carmen cum trimetro Iambico affecta.

*PERSEAM arborem esse Aegypti peculiarem  
scribit Theophrastus lib. 4. de plantis, aspectu venu-  
stam, ingentem, pyro similem cum folijs, tum flori-  
bus, ramisq<sup>3</sup>: cuius etiam poma, quæ copiosè fundit,  
magnitudine pyrum representāt, specie oblonga, amyg-  
dalacea, colore herbido, nuce intus pruno non dissimi-  
li, sed minore multo ac molliore, carne dulci admodū  
ac suauis. Qua ex descriptione deprehendere licet Per-  
seam, nostræ Persico esse congenerem, specie tamen dis-  
sidentem. Nicædri interpres apud Persas letalē prius,  
trāslatam in Aegyptū, terræ mangonio salubrē euasif-  
se scribit: cuius dictis attestatur non uno in loco Gale-  
nus, & locuples testis Iunius Columella li. 9. ijs versib.  
Stipantur calathi pomis quæ barbara Persis  
Miserat (ut fama est) patrijs armata venenis.  
At nunc expositi paruo discrimine leti  
Ambrosios præbent succos, oblita nocendi.  
Quinetiam eiusdem gentis de nomine dicta  
Exiguo properant mitescere Persica malo.*

*Quibus ex verbis facile agnoscitur discrimen in-  
ter has arbores. Porro nux huiusce arboris dura, tur-  
binata, cordis figura non absimilis nucleum operit: in-  
nuente simbolo sapientiam nucleo assimilata, oper-  
culo duro, reферatu difficili esse opertam debere. De hac*

*Plu-*



Plutarchus, lib. de Iside. in hunc modum. Inter plantas quas fert Aegyptus, Perseam eximie præ ceteris Isidi sacram esse voluerunt, quod eius fructus, cordis speciem, folium, lingua representet: nihil enim inter omnia, quæ homini à Deo data sunt, diuinius est sermone, præsertim qui de Deo instituitur, neque maius ad veram felicitatem momentum obtinet. Hæc ille.

## Emblema XXVIII.

Metrum est Iambicum trimetrum, cui subiungitur Archilochium. quale est Horatii illud in Epodis:

*Plecti nihil me, sicut antea, iuuat*

*Scribere versiculos, amore percussum graui.*

ARBOREM pinxero quercum, ut solidioris ligni, firmioribusq; innixam radicibus; qualis virorū principum conditio est, quàm priuatorum, durabilior: cui altrinsecus immineat ex atro & turbulento cælo allatum hominis caput plenis buccis spirans (ita enim ventos pinxere veteres) decutiensq; folia, partim humi strata, viridia licet, partim cadentia, paucis adhuc superstitibus in ramo uno aut altero: cuius caudici circumuoluta schedula loquatur dictū istud Italicè: BASTACH' IO VIVO. Nil mirum est, neque verò absurdum, arbori comparari virum principem, quando & Horat. Pompeium Magnum multitudine pariter atq; magnitudine rerum gestarum clarissimum, allegoricè Ponticam pinum, & Syluæ nobilis filiam nominet. quin & Lucanus poëta eundē Magnum quercui siluæ arborum obsepta, eadem ratione comparat. Princeps, etiāsi de gradu sit exactus diro nouercātis fortune ludibrio; nō patitur tamē generosos illos spiritus ita infringi aut pessundari pro cæcæ sortis libidine, ut quidquā auito progenitorū suorum stemmate indignū admit-



tat: cuiusmodi Gilimerem Vandalorum Regem commemorat Procopius, & nostrū auum talem non unum protulit. Idem in virum fortem & infracti pectori conuenit, honoribus opibúsque per inuidorum suggestiones exutum, contentúmque in otio paupere delitescere.

### Emblema xxix.

Carmini Heroïco subiungitur Iambicum trimetrum.

APVD priscos Romanos Flamini Diali tanta in religione habitam fuisse hederã comperimus, vt eam vel nominare, ne dicam tangere, in expiabile nefas existimaretur, propterea quòd is frutex vincit atque illigat lubrico palmitum errore, quocunque se applicat, vti Festus Pompeius indicat. Nimirū declarat istud symbolum, sacerdotem castum & ab omni lasciuia Venerea quàm maximè alienum esse debere: quando suos amatores ita circumueniunt Veneres & circumuentos enecant, vt hedera solet arboreas vires complexu artissimo vitalis succi inanire. Eidem non licebat annulum solidum aut nodosum digitis inducere: nempe vt ab omni animi angore liberum, neque mali cuiuspiam sibi conscium esse debere ostenderet eum, qui rei diuinæ vacaret. Pictura postulat profanum aliquem depingi, qui Flamini siue sacrifico (Flamen autē pileo insigniebatur, cui virgula oleagina cum paucillo lana erat superimposita, cetero habitu nostris ferè similis, lineo amiculo togæ inducto, vnde Linigerorum nomen) porrigat hederam, sed abnuenti & vestigium reducenti, & altera manu exhibeat annulū circularē & solidū.

### Emblema xxx.

Trimetrum Iambicū monocolon, in quo priores duo versus reciproci sunt, qui transposita à calce dictionum ser-



vic transeunt in pentametros, hoc modo:

*Effere seruili colla repanda iugo  
Irrita taure paras molliter excutere.*

NE QV I C QV AM sapit & ferre recusat iugum,  
qui semel admisit: quando & elephantos iussa facere,  
& Leones iuga subire videmus, haud temerè excutiē-  
da. Sero coniugij capistrum acceptum deplorat mari-  
tus, qui semel collum submisit. Aërem verberat, qui  
publicis muneribus, quæ curanda suscepit, ingratis de-  
fungi parat. Pictura per se clara est.

Emblema XXXI.

Symbolum istud ingeniosè & luculenter à Nasone lib.

Tristium secundo explicatur, ibi:

*Nil prodest, quod non ledere possit idem.*

*Ignem quid utilius? si quis tamen urere tecta*

*Comparat, audaces instruit igne manus.*

*Eripit interdum, modò dat medicina salutem,*

*Quæq; iuuant monstrat, quæq; sit herba nocens.*

*Et latro, & cautus præcingitur ense viator:*

*Ille sed insidias; hic sibi portat opem.*

*Discitur, innocuas ut agat facundia causas:*

*Protegit hæc fontes, immeritosq; premit.*

Usus rei salutem præstat, abusus necem aut detrimen-  
tum saltem adfert: certè ita demum unumquodq; aut  
commodat aut officit, prout eo vel utare vel abutaris.

Lex eadē alio atq; alio sensu accepta, quæ grauaret, reū  
absoluit, innocentem inuoluit. Quàm sæpe scriptura  
membra luxata & veluti assulatim conuulsa, aut in  
partes confecta, aut commate interstincta, hereticos  
armant, causa casuros, ubi loci, vnde petita sunt, te-  
nor expendatur aut attentius consideretur: ita fit ut  
eundem locum pro sui defensione Marcion & Valen-



tinus adducant; Christianus eundem rectius indubitatiúsque pro se alleget: hinc tot schismata, tot pestilentes factiones & prioribus saculis & his nostris inconsutilem illam Christi vestem lacerarunt. Terra & venenorum & omnis boni parens ac alumna, tot perniciés protulit, quot species: tot dolores, quot colores, ut inquit Tertullianus, lib. aduersus Gnosticos. ita Lucretius inquirens causam cur idem alij sit cibus; alij venenum,

Præterea, inquit, nobis veratrum est acre venenum: At capris adipés & coturnicibus auget.

quod & Plinius non tacuit, lib. 10. cap. 72. Venenis, inquiens, capra, et coturnices pinguescunt: (ea est enim verior lectio, quam quæ habet, caprea.) Quin & Aristoteli idem non fuit ignotum. Ad picturæ varietatem pingi potest Helleborus niger, siue, veratrum; quam herbam hinc depasti homines exspirent ac vitam cum morte commutent; inde coturnices aues & capra eo pabulo usæ, vegetæ sint & agiles. Altrinsecus pingatur ignis cui assideat aliquis, ut rigorem expellat: & in proximo, domus incendio conflagrans.

### Emblema xxxii.

Heroicum, cui subiungitur tetrametrum Clodum, siue Episcazon à Plotio dictum, Aristophanium nominat Seruius.

PINGITUR mulier scabello aut tripodi insidens, geminas alas ad modum talarium Mercury expansas, velut paratum volatui peculium, dextra tenens: laua testudinem meritò tardigradam à Pacuio dictam: rursus dextro pede terram premēs; sinistro in altum elato, ita ut dextræ expromptam agilitatem remoretur pedis dextri grauitas rursusq; laeue tarditatem adiunget pedis item laui alacritas. Mediocritatem  
auream



*auream insinuat symbolum: itemq<sub>3</sub> animi moderatio-  
nem, ne ita efferamur, ut sortis nostræ obliuionem in-  
duamus, neue iuxta adagium, ita fugiamus ut præ-  
ter casam. Habet affinitatem cum illo Augusti dicto,  
Festina lentè. Tarditas immodica, precipitatione ca-  
stiganda venit: & celeritas nimia illaudata est & vi-  
tium habet. Itaque modus omni in re seruandus est:  
atque ita festinandum, ne vel tardi, vel precipitis no-  
men incurras.*

## Emblema XXXIII.

*Iambicum trimetrum Archilochium monocolon, Horatia-  
no illi simile:*

*Iam iam efficaci do manus scientie.*

*VERISSIME dictum est ab Ouidio poëta:  
Natura sequitur semina quisque sua.  
nimirum ita fermè comparatum videmus, ut nihil  
tam commodè fiat aut dicatur, quod non detorqueat,  
deprauet, ac sinistrè interpretetur calumnia. Propter-  
eà scitè & festinè dictum est à Theodoro Atheniensi,  
cùm illi fuisset obiectum, quòd multos sua doctrina de-  
teriores redderet, aliorum id vitio accidere, qui sini-  
stra ipsius doctrinam acciperent, quam ipse dextra  
porrigeret. Neque malè sonat vulgatum prouerbiū:  
Volucres pro suo quamq<sub>3</sub> rostri modulo cātillare: cùm  
velit innuere improbos non posse non improbè loqui,  
bonos verò benè. Nempe rosa utilem mellificio mate-  
riam apī suggerit, aranea venenum: Quam sèpè fit  
ut dictum innoxium, ac sine fūco expressum, huic ri-  
sus & leporis seminarium sit; illi Vatiniāni odij fomes  
& incētium. Scriptura sacra, inquit Nazianzenus,  
in prima Stelitētica: probis est virtutis armamentū;  
at sceleratis nequitia stimulus.*



## Emblema xxxiiii.

Heroicum Alcmanio siue Archilochio præpositum, quale  
suprà ix. Embl.

*BACCHVS* cognomento *Psilas*, quasi alitem dicas,  
*Amyclis* vrbe *Laconia* exitiali silëtio nobilitata, cole-  
batur. sua namque lingua *Ψίλα* alas vocabant, quò re-  
spexit fortasse *Catull.* eo versu:

*At parte ex alia florens volitabat Iacchus.*

Voluit autem significare artifex, Vinum, si modus  
adsit, ut trîstitiæ curam hebetare; ita ingenium agile  
reddere & alacre, nihilo secius quàm aues pennis eue-  
hütur, uti à *Pausania* in *Laconicis* proditum est. Ta-  
met si cum *Eubolo* sapientiam vino obumbrari dicat  
*Plinius*, accedo tamen *Plutarchi* sentëtia, inuentionem  
& facundiam vino tribuentis, sic enim in *Symposiacis*  
loquitur: Quidam inter bibendum inuentionis acri-  
monia & linguæ disertitudine, quæ in sobrijs ieiuna &  
contracta erat, seipsos superant, yq<sub>3</sub> vini feruore, ceu  
nidore quopiam thureo suffiri atque expleri se sentiunt,  
metu, qui spiritus generosos cohibebat, exploso: est e-  
nim vinum fecundissimus liberè ac proinde verè loquē-  
di alūnus, sine quo nullus est ingenij et industria usus.  
vinum calore (ut inquit *Plato*) & animum & visce-  
ra imbuunt. Hinc est quòd *Aeschylū* nobilissimum poë-  
tam non nisi inter calices tragœdias suas scripsisse le-  
gimus: *Ennium* vinosum ad canenda bella profiliysse:  
priscos heroās inter calices grauissimis de rebus con-  
sultasse. Neque verò temulentos, siue, quod idem est,  
rationis egentes, scripsisse aut cōsultasse, sed postquam  
mero incaluissent vena, ac dispulsa esset illa ieiunitatis  
segnities, verisimile est. Neque alieniūs à symbolo isto  
cecinit *Niceratus*:

*Egregio vati vinum sit Pegasus ales.*



*Pingatur Bacchus puer, nudus, imberbis, rubidi coloris, leto vultu, pampinis redimitus, corniculis è fronte promicantibus, corpore non obeso aqualiculi instar, sed vegeto & agili, alis extra humeros exstantibus volucer, altera manu botrum tenens; altera, si placet, scyphum: oculis vinacibus, & calum suspectantibus.*

## Emblema xxxv.

*ADOLESCENTIÆ flos non per luxum, de se sue otium deterendus est, sed veris animi ornamentis tingendus, siue id in litterarum atque artium liberalium studio, quibus atas prima ad humanitatem informatur fiat; siue in mechanicis, sedetarijs, alijsue opificijs. siquidem laboribus ut duratur virtus atque adolescit in maius; ita luxu degeneriq; otio exolescit ac diffluit. Laboribus (quos ubique sanctos agnoscit scriptura sacra) & vitæ subsidia queruntur, & lata senectutis adiumenta comparantur. Labor iuuentæ viribus, dum genua virent, conuenientissimus est: at senectutem decet feriatum à laboribus otium, rerumq; partium usus: Quò spectat laudatus ille Ennii poeta versus: Sicut fortis equus, spacio qui fortè supremo Vicit Olympia, nunc senio confectus quiescit. Proinde recte dictum est à Portio Latrone insigni rethore: Quære adolescens, utere senex; & in eandem sententiam à Seneca: Iuueni parandum, Seni utendum: Pingantur hinc adolescens expeditis lacertis, nudo capite, ligone terram proscindens: illinc senex abolla pellit suffultus, in solio accumbens ad genialem mensam epulis scyphisq; exstructam.*



Heroicum comitatum Iambico senario.

PAVSANIAS in Corinthiacis cōmemorat apud Sicyonias exstare nobile Veneris simulacrum ex auro & ebore sculptum Canachi clarissimi statuarij manibus, quæ capite gestet cali orbes, altera manu teneat papauerum capita; altera malum. Innuere artificem voluisse arbitror Veneris in omnia animantia potentiam, quando & Iouem suum in varias species mutatum calo deductum Veneris causa fabulantur poëtae. Huc spectant Lucretij versus:

*Alma Venus, hominum diuinę voluptas, capta lepore  
Illecebrisq; tuis omnis natura animantum  
Te sequitur cupide, quò quamq; inducere pergis.  
Omnibus incutiens blandum per pectora amorem  
Efficis, ut cupide generatim sæcla propagent.*

Pingatur Venus nuda, myrto coronata, cum puero Cupidine alato, cæco, pharetra & arcu instructo, leua malum aureum tenens, dextra papauera: ad ornatum addi potest quadriga à duobus cygnis & columbarū pari numero tracta, cui insideat Venus: nam cygnos eam vehere Horatius, Statius, & Ouidius loquuntur, alij huic muneri columbas deputant: Sappho etiā passeret dat. Porro nemo est, qui nescit papaueris vim præcipuā esse in sopiendo somnoq; conciliando, usque adeo ut copiosiore eius usu inexpugnabilis etiam somni necessitas ac veteris inducatur. Venus autem præsertim moderata, iras implacabiles sopit atq; remittit, testibus Aëtio & Aegineta, ingenij mæstitiam obliterat, animum sedatum reddit, atra bile percitos furiosq; ad sanam mentem reuocat.

Emblema xxxvii.

NEMINI ignotam arbitror nucem Pineā, quam  
super-



*superstitiosa antiquitas Cybela olim sacrarat, colliculis quibusdā inaequalē & asperā, ac veluti in gradus quosdā scansilem mirae duritiae, qui vix, nisi vi ignis expugnati, in valvas dehiscunt, & lacunatos torulos reserant, in quibus nuclei dulces resident, magni ad diversa corporis mala usus, quos & conos & strobilos nomināt peritiores. Hāc insigne, ni fallor, gentilitiū olim domi tuae mihi ostēderas, Tēnere ornatiss. quādo euocatum à Rege in Daniam, humanissime excepisti, eo ferè emblemate in instrumentum omne argenteum addito. Cuius ego nō aliud fermè symbolū puto, quā quod è virtute & eruditione, omniq<sub>3</sub> sapientia (quo non temere nisi per labores peruenitur) dulcissimus omnium existat fructus, qui sapienti recordationem actorum laborum longe incundissimam adferat.*

## Emblema xxxviii.

*Ex Hieroglyphicis notis, quas ignorabiles, Marcellinus nominat, petitum symbolū. Vipera, inquit Plinius, mas caput inserit in os, quod illa abrodit voluptatis dulcedine. Cōfirmat hoc Orus Apollo, addita symboli explicatione, in hac verba: Aegyptij mulierē suum maritū exosam, vitāq<sub>3</sub> illius insidiātem, solumq<sub>3</sub> ob cōcubitū illi assētantē exprimere volētes, viperā pingūt, quae in coitu caput maris insertum ore cōplexa, illud morso truncat. Picturae ratio per se evidens est.*

## Emblema xxxix.

*Alcaicum metrum choriambicum, secūdum Seruium, quale est Flacci illud:*

*Nullam, Vare, sacra vite prius seueris arborem.*

*PINGATUR colūba cauea inclusa, cui insidietur atque immineat altrinsecus supernolans aquila. potest autem in superiore pariter & inferiore cauea limbo, ascribi hic versiculus:*

IL MAL ME PREME, ET ME SPAVENTA  
IL PEGGIO. *Innocentium angustias aptè expri-  
mit symbolum, quos non ita satis tutatur sua tenuitas  
& rei familiaris angustia, quin mille discrimina ab  
impostoribus & rapace hominum genere illos cir-  
cumstent.*

### Emblema XL.

Carmen est AEoliū, à Sappho modis AEoliis delectata, fre-  
quens in vsu habitum, teste Terentiano Mauro, quale  
memorat istud:

*Cordi quando fuisse sibi canit Attida*

*Paruam, florea virginitas sua cū foret.*

NEMO est tam perfunctoriè in poëtarum libris ver-  
satus, cui non suboleat Amorem fingi ignem esse quen-  
dam occultum, qui cor iecūrne, propriam illius sedem  
insideat & præsens absensq; vitalia noctes ac dies de-  
pascat, unde illud est de Didone dictum: Et cæco car-  
pitur igni. Et illud: Est mollis flamma medullas. item  
illud: Quisquis amat, vritur igne graui. atque adeo  
Xenophon ipso etiam igne flammaq; torrentiorem illū  
facit, utpote cū ignis tangentem solum vrat & vici-  
na depopuletur: hic verò etiam in procul obtuentes &  
longo terrarum tractu separatos, ardentes suas sagittas  
acuat, quod inquit Horatius: Itaq; aptè faci compa-  
ratur, quam & sua flamma depascitur, & vicinus ig-  
nis, cui imminet, consumit. Pingatur fax cerea pau-  
latim liquefcens vi ignis propinqui, & accenso ellych-  
nio ab altera parte sese consumens, cui si lubet addi po-  
test Italum hendecasyllabum.

ARDO D'APRESSO, ET DA LONGE MI  
STRVGGO.

EM-



Senarij sunt Iambici acatalectici.

CLEMENS Alexand. li. 5. stromatū refert ex Phercydis Syrij auctoritate Anacharsim Scytham pingi solere, laua manu genitalia operientem, dextra os compescentem, ad modum Harpocratis Aegyptij: eoq<sup>3</sup> symbolo innui, debere nos superare utrumque quidem, & libidinem nimirum seu voluptatum seminarium, & lingua petulantiam. sed hanc potissimum. Laërtius ait statuis huius philosophi additam fuisse sequentem inscriptionem, Lingua, ventri, pudendis impera: quo symbolo ostēditur garrulam & effrenem linguam infinitorum malorū esse causam: luxu fœdius nihil aut scropha dignius: & libidinis incentiuum, velut Circeum poculum ex hominibus belluas nos facere.

Emblema lxii.

Aristophanium Iambicum tetrametrum brachycatalecticum monocolon.

IN describenda Sphinge dissentiunt inter se auctores. siquidem eam triformem fuisse belluam fabulatur Palaphatus corpore canino, facie puellari, alis volucris voce humana. Zēxes Lycophronis interpretes leonina specie antrorsum, posteriore humana unguibus gryphinis, aquila alis eam depingit. Ausonius quoque triformem describit illis versibus in grypho ternario:

Terruit Aōniam volucris, leo, virgo triformis  
Sphinx, volucris pennis, pedibus fera, fronte puella.

Psellus in allegoriis biformem facit, umbilico tenus elegante forma puellam, cetera hispidam, cauda oblonga, & ferinis pedibus, lingua Atticissante & Pythagoræa, hoc est, diserta & sapiente: Aelianus etiam lib.

12. de animal. cap. 7. διφῶν καὶ δίμορρον biformem & duplici constantem natura, ab Aegyptijs effingi sculpig<sup>s</sup>



piq<sub>3</sub> commemorat, mixtura leonini & virginalis corporis in unum conflata: idq<sub>3</sub> Euripidis testimonio confirmat. Suffragantur illi Orig. li. i. contra Cels. dimidia sui parte virginis formam præ se tulisse scribens, & Clemens. Iam verò Diodorus Siculus, & cum Solino Plinius in Simiarum genere enumerant Sphingas, comis villosas, prominulis mammis, & dociles: quæ nihil ad nostrum institutum, nisi quod fabula biformis monstri attestantur. Quid dicam quod Dion Chrysostomus Sphingem allegoricè inscitiam exponit: at Psellus pro homine è dissimilibus constante, siquidem pars nostri rationalem facultatem obtinet, pars brutam naturam sortita est. Nunc ad symbolum veniamus, quod ex Clementis Alexandrini sententia adscribā. Sphinx, inquit lib. 5. Stromatū, pro delubris statuebatur apud Ægyptios, vel quia altis inuolucris operta sit omnis de Deo ratio, & mortalium sensibus obscura atque imperuia: vel quia amare pariter et timere Deum teneamur, ac diligere quidem ut pijs mitem et benignū: metuere verò, ut inexorabilem meritq<sub>3</sub> iustum vindicem scelerum erga impios, siquidem Sphinx humanam pariter & belluinam speciem representat: ut nimirum ferina forma, terribilem eius dūritiam & asperitatem in exigenda ab impijs vindicta insinuet: humana, facilem atque obuiam erga pios clementiam. Hanc in symbolo interpretationem secutus sum, tametsi aliter exponat Synesius Ptolemaïdos Episcopus longè doctissimus in libro De regno, & repetit in libris de Providentia, in hanc ferè sententiam: Sphingem Ægyptia gens ante delubra consecrauit, ut sacrum symbolum coniunctionis virtutum, fortitudinis, & prudentia, dum ferina species robur repre-  
sen-



sentat; humana prudentiam: robur namque prudentia duce destitutum, temerè citraq; consilium & iudicium rapitur, miscens atque confundens omnia: rursus ingenium & industria aut prudentia, quantumvis magna, nisi manus habeat administras, inutilis est atque euanida. Sed hoc eius interpretamentum ideo respui, quòd aliud huius rei symbolum eadem gēs dederit: de quo diximus embl. xlii.

## Emblema XLIII.

VT fulminis, ita & procella eadem est ferè natura & vis, ut validissima quæque ac renitentia sternant, euertant, dissipent. Idem est lioris ingenium. Contra arundinem contumacem aduersus sæuētium nimborum impetus, domitricemq; ruentis celi videmus, nec alijs armis quàm patientia quadam tutam. Neque verò alia est æquitatis animi ratio, quæ inuictò robore despuit ac perferendo inuidiam ceteraq; mala superat, gloriæ immortalis quæstu opulentissima, ubi temeritas succumbit, quam laudem inuenit sæpius.

Qui vitæ honestati innititur fortiter patiens, is & tutè viuit, & de inimicis triumphat serio, taliq; fortuna etiam adiumento esse solet, quod Cornificius dixit. Picturæ ratio obuia est, ubi ventus aliquis tumidis buccis inspirans, ingentes arbores & confringit medias, & reuulsas radicitus profligat, illaso perstante arundineto.

## Emblema XLIII.

PRODICVS Cens philosophus librum conscripsit Horarū nomine, in quo fabulatur Herculem viā ingressum, fortè incidisse in Virtutem ac Vitium; quarū utraq; magno studio illum in suos mores vitæq; insti-

*stitutum pertrahere conata fuerint: tandem victum  
in partes Virtutis concessisse, eiusq<sub>3</sub> sudores antetulisse  
insidiosis ac titillatricibus Viti<sub>3</sub> voluptatibus delicijsq<sub>3</sub>.  
Narrationem omnem licet petas ex Xenophonte, libro  
commentariorum de dictis factisq<sub>3</sub> Socratis secundo.  
Meminit Cicero de officijs lib. primo. Silius Italicus  
elegantem hanc fabulam transtulit, lib. 15. Punici  
belli, ad Scipionem, cui de bello in Africam cogitan-  
ti, dextra laeva<sub>3</sub> adstitisse hinc Virtutem, illinc Vo-  
luptatem fingit, addita utrique oratione ad persua-  
dendum efficaci. Simili ratione Lucian. in somno ap-  
paruisse sibi Statuariam & Doctrinam comminisci-  
tur, quarum utraque sui studium illi persuadere con-  
ta sit. Simile commentum est apud Poggium de indu-  
stria & Pigritia per somnum cuidam apparentibus.  
Tendunt omnia ad vitæ institutum delectumq<sub>3</sub>, qui à  
Deo animarum ephoro seu natura, cùm pubescimus,  
proponitur: id namque tempus aptissimum deligitur  
ad ingrediendam certam aliquã viuendi viam. Neque  
verò aliud est Paridis iudicium, quàm delectus ado-  
lescentis in persequendo hoc aut illo vitæ instituto, dum  
aut recta ratio eum ducit ad verorum bonorum, hoc  
est, Palladiæ vitæ amorem; vel animi affectus vecor-  
dia seductus, ad Venereæ & in speciem pulchræ formæ  
admirationem rapitur & inclinat, uti vult Proclus  
Diadochus in Platonicijs commentarijs.*

Emblema XLV.

Hexametrum, cui subiungitur Iambicum dimetrum catale-  
cticum.

APVD Sain inferioris Aegypti regionis metropo-  
lin, in vestibulo fani Minervæ sacrati, hieroglyphi-  
cū symbolum exsculptum fuisse hoc ordine cōmemorat

Plu-



Plutarchus in libro de Iside: nimirum Infans, Senex, Accipiter, Piscis, Hippopotamus ordine sequebantur: quo admonebantur à primis vitæ initijs ad extremum usque eius terminum, animis hominum insidere debere, quòd Deo nihil sit magis inuisum atque exosum, quàm impudentia. Accipiter autem Dei significationem habet, quoniam ea avis ceteras antecellit & acie obtutus, & volatus pernecitate. Piscis verò odij latentem significationem præfert, propter mare elementum humane naturæ inimicum. Hippopotamus denique impudentiam notat, ut qui genitori quoque suo non parcat, eoque necato vi matrem ineat. Est autem Hippopotamus siue Equus fluuiialis, soli Nilo cognitum animal, corio & pilis vestitum, ut vitulus marinus, quaternis pedibus, ungulis bifidis quales bubus, dorso equi & iuba, rostro resimo, cauda tortuosa & breui, dentibus aprorum aduncis, animal præ ceteris sagacissimum, ut quod in arundinetis succisis cubile ponit, tramitesque à pabulatione auersis vestigijs varios distinguit: & ex voracitate nimia pigrescere se sentiens, arundini præacuta crure impresso, sanguinis profluvium elicit, eaque manitione sibi medetur.

Hæc ferme de Hippopotamo ex Ammiano, Plinio, Solino.

### Emblema. XLVI.

Carmen est Antispasticum tetrametrum, eius generis quod à Seruio Honoratò tali exemplo comprobatur.

Mæcenat atavis, Lydia quos fert, genite.

INTER cetera, quæ leoni sauiissimo animali terrorē incutiunt, enumerat Plinius lib. 8. cap. 16. circumactos rotarum orbes, & cantus gallinaceorum, sed omnium maxime ignes. Confirmat hoc Orus Apollo, nulla

H re magis



re magis domari atque frangi leonis feritatem, quàm accensis facibus. Iræ tumor haud ferme compescitur melius quàm documentis præceptisq; celestis philosophiæ, quæ facis instar mentem illuminat, & ab indomita præcipitis affectus rabie cogitationem auocat, sanæq; doctrinæ suggestionem munit, & animi tranquillitatem conciliat. Præterea & supplicij metus non iram moderatur modo: sed & ceteros affectus velut iniecto freno cohibet. Iræ significatio a tædis non est aliena: nam & definiunt eam sanguinis circum ardorem, vnde Lucret. lib. 3.

Est etiam calor ille animo, quem sumit in ira,  
Cum feruescit, & ex oculis micat acrius ardor.

Quod ad picturam attinet, pingatur fax ardens, & Leo qui auersetur ignem illum.

### Emblema XLVII.

Carmen est Alcaicum dactylicum monocolon, constans pentemineri Iambica, & gemino dactylo, simile illi Horatiano:

Fauete linguæ, carmina non prius.

PINGATUR Ceruus pernicissimo cursu fugiens, sed obliquato non nihil collo, sagittam vulnere hærentem respectans, vt aliqua ratione doloris sensus exprimi videatur. Expressum ex illo Hetrusci poetæ versu qui etiam non absurde appingi potest. DIDVOL' MISTRUGGO, ET DI FUGGIR' STANCO. Qui æger animi peregrinando & trans maria currendo doloris fastidium leuare se posse sperat, non absimilis est huic Ceruo, nam & ægrimonie vulnus animo circumfert, & opes atterendo, ac in ignota incurrendo hospitia, dum malè tractatur, lassescit, crudelitatemq; vulnere adauget.



Heroicum est Archilochio tetrametro adiunctum.

DESUMPTVM est ex Plutarcho, libro de Iside sapiens antea citato, ubi sic ait: In Creta Iouis fuit statua, auribus mutila: quo symbolo innuere voluit artifex, principem & qui ius in omnes habeat, non debere alicui aures suas mancipio dare. hoc est, ita accommodare ut ab illo possessa videantur, utq; illarum obsequio abuti queat. Nihil perniciosius est quàm quòd aures in omne patentes princeps habeat: id quod Marcellinus lib. 16. de Constantino Cesare prædicat, turpem tanto Imperatori maculam adspargens; contrà quàm præclarum acroama & elogium Iuliano lib. 18. idem tribuit illius patrueli, quo prædicat eum personarum indeclinabilem iusti iniustiq; fuisse distinctorem: addito & documenti vice exemplo laudabili, quod huiusmodi est: nã cum Numerius, Prouinciæ Narbonensis rector, peculatus insimulatus, rationibus crimē obiectũ facile dilueret, ac Cephidius orator hominis innocentiam acerrimè oppugnaret, inopsq; documentorũ exclamaret: Neminem quenquam nocentem fore, si infitari sufficeret: Iulianus sapienter ex tempore subiecit, Ecquis tãdem innocens erit, si accusasse sufficiet? Non alienum hinc est Alexandri Macedonis factum, altera manu opposita aurem obstruentis, ut ore seruaretur integra.

## Emblema. XLIX.

Trochaicum Sotadicum trimetrum acatalecticum monocolon, quale illud apud Marium Seruium:

Arua sicca nimbus intrat, ite leti.

CVLEX insectum flammæ splendore mirè gaudet: itaque lucernis aduolitat, moxq; exustis alis cõcidit, atq; interit. unde et Pyrausta gaudiũ et interitus, in

*proverbium abiit. Non absimilis est condicio amantis, qui inescatus amoribus, temeritatis sua fructus metit, et quem deperit, igne perit: quò spectat Aeschyli Tragici poëta senarius:*

*Pyrausta inertem pertimeo necem nimis.*

*Potuit & pudicus amor huiusce calamitatis sensum incurrere, quando Euadnen legimus præ nimio coniugis Capanei amore seipsam ultro pyra ardenti iniecisse: Portiam legitimi amoris singulare ornamentum, marito Bruto extincto, ardentibus carbonibus ore haustis, vitam abruptisse, testante Valerio Maximo. Nam Dido se ipsa ferro consumens dubium in utramvis partem exemplum attulit: ita ut pictura per se alioqui manifestæ adscribi queat versiculus Italicus:*

*COSI DI BEN' AMAR, PORTO TORMENTO.*

### Emblema L.

*COMPLECTITVR istud emblema ternas precipuas uxoris dotes, nimirum residem domi sua operam (cuius explicatio XXI. emblem. elucescit) deinde opum mariti industria quasitarum custodiam, postremo linguae continentiam. Pingatur itaque recto corporis statu mulier, dextra clauium fascem præ se tenens; laeva ori opposita, qua specie Angeronia Dea, silentij præsul, prænexo obsignatoq; ore figurabatur apud priscos.*

### Emblema LI.

*ADAMAS ut inter gemmas facile principatum obtinet, neque mirum, quippe cui vis indomita nomen Græca interpretatione dedit; ita duarum violentissimæ naturæ rerum, ferri ignisq; contemptricem vim singulari prerogativa iam olim possidet, atque auctori-*  
tate



tate scriptorum veluti mancipi tenet: quādo enim incudes, nedū malleos ferreos dissilire inusitata sua duritie faciat; hinc est quod adamantē (quē opū gaudium præclaro elogio nuncupat Plinius) reliqua vi omni in-fragilem atq; inuictum, solo hircino sanguine, nec nisi recenter à cæde feruente, rumpi posse naturalium rerum ventilatores negant. Emblema desumptū est (ne quis nobis fascinus à maleuolis obrepat, qui cādide nostros labores in publicum proferimus) ē librorum Pragæ, quæ Bohenziæ copiosissima facile & literarum studijs celeberrima est ciuitas, excusorum frontispicio: uti annulus pala inclusum habens adamantem, decussatim præfert hinc securim Amazoniam; inde trullam ferream igne ardente coruscantem.

## Emblema LII.

Carmen est heroicum cum Archilochio dactylico hypercatalectico.

TRES sunt capitales veræ laudis ac honestatis omnis hostes; tres exitiales pestes, Inertia, Gula, Venus: Hæ nimirum sunt pellaces illæ Sirenes, quibus sapientiæ adūbrator Ulysses aures obstruxerat: hæ veræ Gorgones torporē menti industriaq; conciliantes: hæ ipsissimæ Harpyiæ animorum pabuli depeculatrices, quæ patria, hoc est, mentis bona comedunt, ratione exuūt, animiq; lumē excecant. Pingatur homo Sardanapali aut Bonosi cuiuspiā similis, ventricosus, & obesus, accumbēs resupinus in lectulo, subalaribus culcitris innixus, dextram pateræ iniiciens in mensa apposita, laua Venerem expapillatā contrectans: addatur ad latus Gloria fugientis specie, retrospectans, & auersa manu veluti valedicens. Porrò Gloriæ purpureus habitus, ut latè conspicuus, aut Attalici generis, tribui debet, cum laurea corona sempiternitatis teste: cuius plantis ad-

ycerem talaſes alas ad modum Mercurij: paludamentum autem illud purpureū aut χρυσόπασον linguis oculisq<sub>3</sub> paſſim adſperſum diſtinguerē; tum quia gloria latè in terrarum orbem dimanat; tum quia gloria celebrem omnium ora loquuntur, in eundē omnium coniecti ſunt oculi.

## Emblema LIII.

Metrum eſt Iambicum tetrametrum monocolon.

NEMINI non eſt in ore vetuſti poëta dictum: Veritas Temporis filia, quòd nimirum tempus in lucem proferat veritatem: Saturnum autem pro tempore accipi indubitatum eſt. Iam verò cōſtat Democritum dixiſſe quondā veritatē altiffimo in puteo demerſam atq<sub>3</sub> obrutā iacere: unde ſumpta eſt fingendi Emblematis occaſio. Pingatur virgo nuda Veritas, è ſpecu obſcuro inter ſcopulos umbilico tenus emicans, quā Saturnus libratis in aëre alis volitans dextra educit: circumſtent hinc inde tres feminea ſpecie peſtes, Discordia, Calumnia & Invidia, quæ ſuccinctæ et ligonibus inſtructæ manibus pedibusq<sub>3</sub> conentur veritatem egeſta humo obruere. Nunc ſingulatim perſonarum habitum ac ſpeciem demus. Veritas virgo pingitur niveo & ſimplici, rugisq<sub>3</sub> carente, amiculo induta, puro oculorum lumine irradians. Calumniam olim ab Apelle pictorū coryphæo ita depictā inſinuat Lucian. ut ornatu ſit pulcro, forma egregia, adſpectū ardente, læva ardentem tēdam præferens; dextra ſupplicem adoleſcentem per capillos trahens: Invidia macie lurida pingatur, obliquata oculorum acie, viperis circum caput errantibus redimita, corq<sub>3</sub> humanum ori admonens comedendum. Discordiæ, ſive Litis imaginem dabo emblemate LIIII. Saturnus autem aperto capite pingatur, ſenis ſpecie, alatus, læva falcem tenēs,

aut,



aut, ut alij malunt, clepsydram: Reliqua pictura pars è superioribus patet.

## Emblema LIIII.

SYMBOLVM per se dilucidius est, quàm ut disertò in re clara esse lubeat. quis enim mali omnis parentem discordiam non cecinit, mare calo permiscere doctam? Pictam hanc graphicè expressit in Satyrarum fragmentis, Petronius Arbiter, què magna ex parte secutus, eiusmodi picturam dederim. Pingatur mulier lacrymis oculis oppleta, scisso capillitio, comas viperis implexas habens, scabris dentibus & liuidis, sanguinea manu facem ardentem quatiens, quæ pedibus follem deprimat, cuius acrophysion, siue caput foculum propinquum excitet cum fumo & flamma.

## Emblema LV.

MUSCA, meritò ab Homero impudens dicta; qua nullum animal minus docile putatur, minorisq; intellectus, impudetes aliena fama obtrectatores denotat, aut emulos Zoilos, qui ad bene dicta conuiuent, in vitio leni aut lubrico lapsu immorantur, illudq; suggillant. Apis candidi lectoris exemplum est qui Musarum prætæperuolitat, & utilem mellificio succum depascitur: aut qui Virgiliano more è fimo gemas colligit ex horride insciteq; dictis, veneres dicendi conquirat. Pingatur hinc musca iumeto hulceroso insidens, virusq; depascens; illinc apis thymum floresq; delibans.

## Emblema LVI.

CITAVIMVS in Adagiorum nostrorum octaua Centuria, prouerbiū à Dionysio Longino rhetore usurpatum, Ψυχῆς γλωττόκομον δουλεία Animi scriniū seruitus: quòd ea sit animi retinaculū, neq; sinat libero nos ore eloqui, & liberaliter expromere, quæ animo



concepimus, addicti magnatum seruitio, vel saltem eorum tyrannide prohibiti, velut iniecto ori freno, cum libertas eloquentiæ nutritrix sit ac parens. Nimirum ea tyrannis ab antiquissimis temporibus inoleuit à principibus usurpata, volentibus flagitia sua virtutum velaminibus tegi, perfidiam specioso fidei fuco induci. Ea fauendi vitijs consuetudo, vsu stabilita, atque in mores recepta, ingenia scribentium seruitute degeneri ita corrumpit, vt nihil sit ab hac parte sani, vt sacrosancta illa historiarum fides penitus interierit, vt illaudatos Busires & portenta caelestibus propè æquemus. Inde excogitata fuit ingeniosa illa pœna & animaduersio, qua libri incēdio absumi iussi sunt Senatus-consulto in Imperatorum, ne dicā orbis pestium, gratiam; quod de Labieni scriptis memorat Seneca, de Cremutij Cordi Tacitus. Emblemata petitum est ex Philostrato in Scopeliani sophistæ imagine, qui deprecatus operam à Clazomenijs imperatam, qua domi ludum aperiret, respondet, Lusciniam in cauea cantillare. Pictura per se euident, luscinia cauea inclusam, postulat, sed desidē non volucrem.

## Emblema. LVII.

DION aurei oris cognomine celebratissimus Græcis philosophus & orator, in Diogene siue de famulatio, Emblematis istius occasionem dedit, vbi diuites onerosa famulorum turba stipatos, Iulius (chenilles Gallicè, nisi fallor; millepedas multipedasue Latina lingua nuncupat pilosos vermes arcuatim progredientes) assimilat: qui etsi pedum agmen infinitum moueant; reptilium tamen sunt facile tardissimi: ita enim sonāt eius verba, ἐστὶ τὸ πρᾶγμα ὁμοίον τοῖς ἰούλοις, οἱ μὲν γὰρ πόδας ἔχοντες, βραδύτατοι εἰσὶ τῶν πετῶν. Non absimili ratione triremes Paridis, quibus Helenam petebat, ob remorum ordinem multiugum, ἰουλοπέζους, quasi Iuli instar gressiles appellat. His ap-  
tissimè



tissimè Crassi nostri torquati mancipijs locupletes, & Tātali fame cōturbatrice nobiles cōparantur, qui an-  
satis lateribus platearū spatia cōplēt, pellitis abollis, &  
ferarū tergoribus hirsuti, fractoq; incessu superbi, mul-  
titudinē affectantiū ministrorū puerorūq; ponē & v-  
tring; attrahūt. millepeda nō ignota forma est, ac pro-  
inde obuia picturæ ratio, nisi quod venustanda illius  
gratia adyici superiore in tabula margine torquatus ali-  
quis multo comitatu superbus possit.

## Emblema LVIII.

INGENIVM & industria quid non valet, quid  
non penetrat, atque peruadit? quo si accedat assidui-  
tas sedula & indefessa, crebris operis eandē incudē no-  
cte diuq; tundentibus, operi instās, ne tum rotundum  
nescio quid & absolutū (cuiusmodi orbicularis ille sci-  
entiarum ductus promittit) exsistat inde necessum est.  
Vetus illud ac veritati consonum est: Crebris ictibus  
quercū deiici, cōtinuæ atq; infatigabilis diligentia ar-  
gumēto, & difficillima etiā quæq; ea via superentur a-  
deò & perficiantur; Herculeis ac Theseiis laboribus  
omnia quamuis ardua, cælum deniq; ipsum, pateant.  
Verè ille, Labor improbus omnia vincit. Palis et stipi-  
tibus, quos fistuca adegerint, telluris ipsius solum, &  
ēδος ἀσφαλές (ut Hesiod. canit) pertundi videmus.  
Has tibi sublicas, Susianæ quidē familiæ insignia, sed  
easde pertinacis industriæ symbola, animo insigas ve-  
lim, Petre fili, ne torpor hinc te reuocet, inde despe-  
ratio ad summa euadendi deiiciat; quin potius insta  
emulatione ad domestici exempli gloriam laudisq; ha-  
reditatem adspires assiduo studio, quod nocturna di-  
urnaq; manu tractatum, cunctas tibi difficultates, ve-  
lut propitia quedam Lucina, peruias aperiet.

# AVCTORVM NOMINA E QVIBVS PROFECIMVS, ET QVO- RVM TESTIMONIO SVMVS VSI.

Aelianus.	Galenus.
Aëtius.	Gregorius Nazianzenus.
Albericus.	Harpocraton.
Alcæus.	Hermes Trismegistus.
Aeschylus.	Herodotus.
Ambrosius.	Hesiodus.
Ammianus Marcellinus.	Homerus.
Apuleius.	Horatius.
Aristeas.	Hugo Cardinalis.
Aristophanes.	Hugo Eterianus.
Aristophanis interpres.	Ioannes Stobæus
Aristoteles.	Isocrates.
Artemidorus.	Iunius Columella,
Athanasius.	Iustinus Martyr.
Au. Gellius.	Lactantius
Aurelius Victor.	Laërtius.
Aufonius.	Lilius Gyraldus.
Catullus.	Lucanus.
Cebes.	Lucianus.
Clemens Alexandrinus.	Lucretius.
Cornelius Celsus.	Lycophron.
Cornelius Tacitus.	Macrobius.
Cornutus.	Marius Plotius
Diodorus Siculus.	Marius Seruius.
Dion Chrysostomus.	Martialis Episcopus.
Dionysius Areopag.	Martialis poëta.
Dionysius Longinus.	Nicandri interpres.
Dioscorides.	Nicephorus
Epictetus.	Oppianus.
Epigrammata Græca	Origenes.
Erasmus.	Orus Apollo.
Eusebius.	Ouidius.
Festus Pompeius.	Paulus Aegineta.
Fulgentius.	Pausanias.



Petronius Arbiter.  
Philes.  
Philostratus.  
Pindarus.  
Plato.  
Plinius.  
Plutarchus.  
Portius Latro.  
Proclus Diadochus.  
Procopius.  
Psellus.  
Qu. Curtius.  
Sappho.  
Seneca.

Sillius Italicus.  
Solinus.  
Statius.  
Strabo.  
Suidas.  
Synesius.  
Terentianus Maurus.  
Tertullianus.  
Theophrastus.  
Valerius Maximus.  
Vitruvius.  
Xenophon.  
Zezes.  
Zoroastres.

CLARISS. VIRO ARNOLDO  
ROSENBERGO IVRISCONSULTO,  
HADR. IVNIUS MEDICVS S. D.



EXTA tibi numeris latebroſa Aenig-  
mata mitto,  
Quæ dextra enodes Oedipus arte  
nouus.

Rosenberge decus Charitum, Muſæque nouen.e  
Rarum ornamentum, præſidiumque meum:  
Nempe quaterdenos, cū quatuor, ordine gryphos:  
Ad numerum tenebris lux rediuiua venit.  
Sic Ariadnæo filo duce fugerat olim  
Aegides latebras, cæcæque tecta domus.  
Prima tenet Calamus gracilis: <sup>2</sup>Nix algida: mollis  
<sup>3</sup>Spongia: cumq; <sup>4</sup>Manu thus <sup>5</sup>Libanotis olens:  
<sup>6</sup>Ignis edax: <sup>7</sup>Echo reſonans: aſſertor <sup>8</sup>Ieſus:  
Cum <sup>9</sup>Cereris potu, mollia <sup>10</sup>Vina ſimul:  
Fiſtilis <sup>11</sup>Olla: <sup>12</sup>Vitrum fragile: <sup>13</sup>Ænux <sup>14</sup>Caſta-  
na: <sup>15</sup>Taurus

Hinc ſequitur: <sup>16</sup>ſcætes <sup>17</sup>Matula: <sup>18</sup>Rana loquax:  
Inſtabile <sup>19</sup>Argentū viuū: <sup>20</sup>Pappiq; volantes:  
Turgidulum <sup>21</sup>Ceraſum: pendula <sup>22</sup>Araneola:  
Tardigradus <sup>23</sup>Cancer: <sup>24</sup>Paries et ſtructilis: adde  
<sup>25</sup>Clyſma aluum ducens: <sup>26</sup>Aurea mala ſuper:  
<sup>27</sup>Cāpanū es: <sup>28</sup>Limaxq; piger: <sup>29</sup>Ceruiq; fugaces:  
<sup>30</sup>Pileolus capitis: Velinolaq; <sup>31</sup>rates:

Et



Et<sup>3\*</sup> Mēbrana, tenax quam cera obsignat aratā:  
 Mollis<sup>3</sup> Charta: agilis<sup>32</sup> pes: volucrisq; <sup>33</sup> Pila.  
 Hinc<sup>34</sup> Vespertilio sese ordine stridula iungit:  
 Et cum dentato<sup>35</sup> Pectine, dura<sup>36</sup> Silex.  
 Post agmē claudūt<sup>37</sup> Morū: <sup>38</sup> Canis impiger, atq;  
 Sol<sup>39</sup> candens: simul huc, <sup>40</sup> ceree Lichne, subis.  
 Coniugis<sup>41</sup> & votum, cui vincla iugalia sordent:  
<sup>42</sup> Temporis vsura: & <sup>43</sup> Cos sine fine rotans:  
<sup>44</sup> Prurigo imponet mordax Colophona libello,  
 Qui nostra in lucem prurit abire manu.  
 En tibi materiem, quæ pangitur ordine, libri,  
 Qui rerum exponit nomina luce data.  
 Haud alio tenuis mea nunc tibi Musa litabit:  
 Complacat magnos vel mola salsa Deos.  
 Disce fauere orsis, auram adspirato secundam:  
 Quod cecini, nitida fronte benignus habe:  
 Neu fallas nugis tua seria: tunc breue volues,  
 Cū madidus cenam soluet Iacchus, opus.

## I.

E S T mibi forma teres: cauus, at non peruius alius;  
 Quem medium nodis spissa medulla secat.  
 Porrigor in caudam, cui barbula vestit utramque  
 Oram; qua volucris sum vice remigij.  
 Ex sanguis, de carne tamen satus, huius alumnus:  
 Nec nisi carnosio vellor ab usque sino.  
 Iam truncus capite, & diffissa cuspide sectus,  
 Proluo me succo Sepia nigra, tuo.  
 Vsus abest linguae, tamen illa exerceo parte  
 Ius necis & vitae: tristia bella sero:  
 Componoq; animos: regum iras mitigo et armo.  
 Atro felle mea aut spicula melle madent.  
 Hoc potior lingua: sine me moritura quod huius  
 Sit soboles: nostram secula longa manent.  
 Illa etiam solas praesentis manat ad aures,  
 Nostra vel immenso, quâ patet, orbe sonat.

## ALITER, SED E GALLICO

## I D I O M A T E.

M E gignit nutritq; caro, de carne reuellor,  
 Carnis abest species, nulla est substantia carnis.  
 Artus crescenti inualidi, mucosaq; origo.  
 Truncatusq; caput, madidum bibo cuspide rorem,  
 Quo Genij lati aut irati semina prodo.  
 Fas perago atque nefas: facilis bona paruaq; sector.  
 Dissidy ac pacis sum Regibus auctor: amantes  
 Concilio: moderor mentes, & tempero curas.  
 Saepe simultates idem qui concito, soluo.  
 Quaeq; velim sciri, totum dissemino in orbem.  
 Criminis ipse exsors, multi sum causa laboris.  
 Dicam te Oedipoden, si quid sim, nomine prodas.



## I I.

Candidior cygni plumis, sum filia Brumæ,  
 Dura minus glacie; sed nec minus algida: fungo  
 Rarior, ac fluidum in laticem tabesco tepore:  
 Signo nouem, fuerit si litera prima recisa:  
 Cor mihi si iungas, vix est auis atrior ulla.

## I I I.

Tethyos undisonæ medijs ego nascor in aruis,  
 Meq<sub>3</sub> cauernosam fistula crebra forat.  
 Non inuita graui leuis impleo viscera succo,  
 Quem reuomo exsorptum pollice pressa prius.  
 Peniculiq<sub>3</sub> loco mensas extergeo mollis,  
 Et rapio sordes, ulceraq<sub>3</sub> exanio.

## I I I I.

Porrigo in ramos quinos, & quilibet horum  
 Diditur in triplices nodos; nisi quintus egeret  
 Uno, qui solus respondet robore cunctis:  
 Vndique colliculis surgo, in vallemq<sub>3</sub> resido:  
 Ast abaci, desit si forte, ego munia præsto.

## V.

Thuris odorati de me salit halitus; unde  
 Natales nostrum nomen sibi vendicat ortus.  
 Prodigæ quæ nimium nostri, per vulnera vitam  
 Effundo, digitus nisi det carpendo medelam.

## V I.

Ex me nata Sophi perhibent primordia rerum;  
 Ultimus & rerum finis & orbis ero.  
 Omnia consumo, nostrum neque nomen abhorret

*Ipse Deus: lenius mobiliusq; nihil.*

## VII.

*Delicia Panos, prolis Cephisia amores,  
Conualles adamo, porticibusq; vabor.  
Indocilis, prior ipsa loqui, aut reticere loquenti:  
Assecta dictorum, & vocis imago vocor.*

## VIII.

*Dicito, quale putes nomen, quod recta columna  
Inchoat, inde tridens fuscina nectit idem:  
Flexus utrinque uncus secat: hinc binij nota: claudit  
Idem uncus medio, qui stetit ante, loco.*

## IX.

*Nomine sum vini non digna; vicem tamen huius  
Impleo, dum cerebri victrix percello cauernas;  
Illud sol radians, me Mulciber excoquit: amne  
Gignor, alitq; Ceres madefacti farris aceruis.*

## X.

*Do vires, adimoq; & origo nominis à vi:  
Ingenium exacuo, pectora soluo metu:  
Me gignit Tellus: rutilo sol concoquit igne:  
Mox ventrosa tegunt dolia, praela vomunt.*

## XI.

*Stat currente rota fictus cauus alueus, vda  
Argilla ductus, Mulciberi in gremio.*

## XII.

*Aëris excludo, tempestatumq; malignam  
Vim, transmitto tamen lucem, non perfluo: Bacchum  
Accipio gremio: nostroq; fideliter aluo*

*Assy.*



*Assyrios nimbos fragrantiaq<sub>3</sub> unguina credas.  
Lumina confirmo speculiq<sub>3</sub> exerceo munus.  
Quin auri nostro pretium concedat honori,  
Malleolo si fortè sequax, & ductilis essem.*

## X I I I.

*Est mihi dura caro, rugosa veste voluta:  
Includor corij tegmine Phœnicei.  
Exterius Natura hirto munivit Echino:  
Mensam orno, panis dum vice soluo famem.*

## X I I I I.

*Signiferi sidus, Cilicum mons, Pasiphaës q<sub>3</sub>  
Nobilis infessor, vector Agenoridis.  
A me nomen habet gens quæ tulit Iphianassan  
Fœdantem Scythicæ sacra cruore Deæ.*

## X V.

*Inuentum lascina putor, Sybari, esse tuorum:  
Fictilis aut st anno, aut Cyprio sim fusilis ære.  
Usibus humanis nil me magis utile, quamuis  
Vilius haud quidquam, nec me despectius exstat.*

## X V I.

*Vox mihi rauca aures radit, sum garrula lingua:  
Vlva sub sterili mollia regna colo:  
Vitaq<sub>3</sub> verè nouo rediuiua recurrit in artus,  
Candidæ aui, gracili cruribus, esca petor.*

## X V I I.

*Haud temerè inuenias grauius quidquã, attamẽ una  
Mobilitate viget: si vinclis exeat artis,*

*Labitur in partes mille, & reparatur in unum  
Rursus: idem immutat species rerum atque colores.*

## XVII.

*Dum iuuenilis adest vigor, est graue: moxq; senecta  
Succedente volat leuiter sine prapete penna,  
Et pratexit humum tenui sub polline tectam.*

## XIX.

*Rubra mihi cutis est: latet intus vineus humor:  
Os pro corde gero, semen at illud habet.*

## XX.

*Usus abest manuum: ducens pede stamina texo:  
Aluus lanigera fertilitate scatet.  
Cum pedicas muscis, scutulatum rete faceffo,  
Concedunt tramis serica fila meis.*

## XXI.

*Zodiaci gemino munitum forcipe signum,  
Pugnantem Alciden mordicus appetij.  
Et testudineo gressu feror octipes: aquor  
Innato: sum fœdum, luctiferumq; malum.*

## XXII.

*Calce coagmentor, quadrato marmore surgo:  
Defendo nimbos, fulcio tecta domus:  
E demas, Idæ pastor, indexq; Dearum,  
Exitium Troie, clarus adulter ero.  
Tollito P, cornu ferio, ruo moenia, calum  
Orno, Helles vector, victima grata sacris.*

## XXIII.

*Ibidis inuentum Phariæ, ventrisq; morantem  
Immisso rostro depleo proluuiem.*

## XXIV.

*Me vigil Hesperia serpens custodit ore:*



De fuluo color insignis, nomenq<sub>3</sub> metallo  
 Fluxit: natura est dispar, cui viscera frigent,  
 Exteriora calent: gratoq<sub>3</sub> embammate mensis  
 Expetitur succus, conditur pyxide corpus.

## XXV.

Malleus illisu insultat mihi; mox ego motum  
 Aëra percello, & patulas dilabor ad aures:  
 Clepsydra melius properantes metior horas:  
 Cogo hominum cœtus, tonitrus fugo, tempora signo.

## XXVI.

Ex ossis, pedibus cassus, non horreo spinis,  
 Proq<sub>3</sub> oculis implent cornua bina vicem.  
 Ex sanguis, quaqua incedo tractu illino mucrum,  
 Latifer est mihi sal hostis & exitium.

## XXVII.

Corniger, ac timidus, pedibusq<sub>3</sub> fugacibus Euro  
 Ocyor, at furias mi citat alma Venus.  
 Lassus, aqua vires reparo: Spadixq<sub>3</sub> colore,  
 Cornicis supero sæcula longa quater.

## XXVIII.

Libertatem olim dederam, nunc arceo frigus:  
 Materies fuerant pili, nunc lanea fila;  
 Aut etiam trama, Seres quas arbore pectunt.

## XXIX.

Filia pinifera silvæ, levis innatat æquor,  
 Alio grande tamen per mare vectat onus:  
 Linigeroq<sub>3</sub> sinu ventis famulatur, & iras  
 Neptuni ridens, humida regna secat.

## XXX.

Anser, apis, vitulus, rerum potiuntur, & orbis  
 Tergeminum brutum frena superba regit:  
 Res similis monstri, condigna interprete, qualis

*Thebigenæ nodos soluere Sphingis amet:  
 Membranam vitulus præbet, calamósque canorus  
 Anser, apes stipant cerea dona vaga:  
 Fasq<sub>3</sub> nefásque tria hæc obeunt, dum tergora chartæ  
 Penna arat, obstringit cera notata fidem:  
 His humana tribus diuinâq<sub>3</sub> iura reguntur,  
 Omneq<sub>3</sub> momentum hoc cardine terna trahunt.*

## XXXI.

*Sectilis in tennes membranas candida lamna,  
 Conflata ex atomis, quos lintea fragmina reddunt  
 Diffusa in lympham, exilis quos ficina cogit:  
 Inde coactilibus stipor; mox arida sole,  
 Præbeo me calami diffissa cuspide arandam.*

## XXXII.

*Metior, ingredior: tendoq<sub>3</sub> & carbasa laxo:  
 Nec moduli, aut versus me sine stare queunt.*

## XXXIII.

*Glabra foris, pilosa intus, specieq<sub>3</sub> globosa,  
 Exsilio quanquam mî pedis usus abest:  
 Aëreasq<sub>3</sub> carens pennis volitabo per auras:  
 Et vires crebro pulsa resumo novas.*

## XXXIII I.

*Est mihi de sero deductum vespere nomen:  
 Ala mihi cutea est, plumaq<sub>3</sub> mollis abest.  
 Sola animum pario, soli vbera lacte tumescunt:  
 Aspera sunt soli dentibus ora mihi.*

## XXXV.

*Buxea materies, numerosoq<sub>3</sub> ordine dentis  
 Distincta, implexam diuido cæsariem.*

## XXXVI.

*An grauius quidquam est, vel durius? attamen ignis  
 Hinc saluunt scatebræ, fonticuliq<sub>3</sub> lenis.*

## XXXVII



## XXXVII.

*Primum albus pallor ruber hinc cruor inficit ora.*

*Mox succum euinco, sepia pulla, tuum.*

*Ultimus erumpo: ast inter matureo primos:*

*Est genitrix sapiens, nomine stulta tamen.*

*Assyrios iuuenum monumento testor amores:*

*Vinosi laticis rore placere queo.*

## XXXVIII.

*Corporeæ languent vires, rimisq<sub>3</sub> fatiscunt*

*Arua, agrum nostra vi rotat ora pecus.*

*Relligione pia coluit Pelusia tellus,*

*Nostra fides cunctis obsequiumq<sub>3</sub> placet.*

*Nos tamen infamat tumulto Priameia coniux,*

*Atque incesta Helene nomine abusa meo.*

## XXXIX.

*Rerum oculus cunctis, candens saxum esse putabar*

*Nonnullis, discus' ve, aut lucida lamina ( tanta*

*De me pugna Sophos exercuit ) huic pede maior*

*Non videor; telluri alius me exaequat inert.*

*Attamen unus ego lustro, gigno, excoquo cuncta.*

## XL.

*Stuppa medulla mihi, labor ast apis ingeniosa*

*Scapus mihi est: ab igne flammam mutuo.*

## XLI.

*Olim dedi, quo tunc carebam, munere;*

*Datum tamen, possideo nunc, atque id colo.*

*O si diem illum Iupiter bonus vehat!*

*Quo non haberem, quod darem alteri tamen.*

## XLII.

*Est, cuius cunctis aqua est data copia, cuius*

*Ex aquo egemus infimi atque maximi.*

*Quid, quod idem nimium huic, aut parcè suppetit illi,  
Ut quisque rectè secius' ne eo utitur?*

## X L I I I.

*Sum Terra soboles: radiati Solis imago  
Formaq; libratam geminus me sustinet axis:  
Attenuor, tenuoque simul, celerique rotatu  
Perpluor impulsa, & vires adspergine sumo.  
Omnia fœcundans, elementum absumo, vomoq;  
In medijs (dictu mirabile) fluctibus ignem.  
Quin nuda omnigenis occurso durior armis,  
Obiectosq; domo lacera cute certius hostes.  
Quid, quod & arcessor, quamvis innoxia, cadis?*

## X L I I I.

*Carnea sulcetur si glebula corneo aratro,  
Non mel dulce dabit, sed feret acre piper.*

## A L I T E R.

*Agrum caneto carneum ne vomere  
Arare pergas corneo: pro mellea  
Semente, mox reponet vrens tibi piper.  
Cupido eandē dulcamarus vim tenet, γλυκυπικρός.  
Pro melle fellent propinans poculum.  
Fœdare strictis unguibus cutim caue,  
Assiduus est Pruriginis comes Dolor.*

## F I N I S.



SVMMA PRIVILEGIORVM.

PHILIPPI Regis Hisp. &c. Ducis Brab. &c. Priuilegijs cautum est, ne quis ante sexennium citra Christophori Plantini voluntatem, *Emblemata & AEnigmata ab Hadr. Iunio Medico conscripta*, imprimat, aut alibi impressa importet, venaliâve habeat, intra omnes ditionis eius fines. qui secus faxit; confiscationis librorum, & pœna fisco Regio exsoluenda, multabitur: vt latius patet in ipsis diplomatis; quorum alterum datum Bruxellæ: Anno, M. D. LXV. VI. Ianuar. Subfig. De la Torre

Alterum verò XI. Martij Subfig.

De Perre.

SVMMA PRIVIL. IMPERATOR.

MAXIMILIANI II. Romanorum imperatoris semp. Augusti, publico edicto cautum & sancitum est; ne quis cuiuscunque status, gradus, ordinis, aut conditionis fuerit, quacunque sacri Romani imperij, & ditionis eius fines patent, quæcunque probatorum auctorum opera, quotquot vel hætenus nondum impressa, vel ab aliis quidem impressa, nouis autem deinceps scholiis, annotationibus, aut commentariis aucta & illustrata Christophorus Plantinus ciuis & typographus Antuerpiensis primus typis procuderit, intra proximū sexennium à prima cuiusque operis aut voluminis editione vlllo pacto eiusdem vel diuersi characteris forma excudat, aut excusa ab aliis intra eiusdem Maximiliani & Imperij fines vendenda importet, seu quouis modo distrahat manifestè vel occultè, sub pœna decem Marcharum auri puri, quarum dimidia fisco Imperiali fraudis vindici, residua verò pars prænominato Plantino cedat, præter librorum ad imitationem impressorum amissionem, quos idem Plantinus vbicunq; locorum nactus fuerit per se, vel suos, adiumento Magistratus loci, vel citra, propria auctoritate sibi vendicare, inque suam potestatem redigere poterit. In cuius rei fidem ipsi Edicto manu subscripsit, & sigillum apponi iussit Cæsarea Maiestas. Datum in ciuitate Viennæ Austriæ, die vigesima prima mensis Februarij. Anno Domini millesimo quingentesimo sexagesimo quinto: Subfig.

Maximilianus.

Ad mandatum sacræ  
Cæs. M. proprium.

Haller

THE UNIVERSITY OF CHICAGO  
LIBRARY  
1000 S. MICHIGAN AVE.  
CHICAGO, ILL. 60607  
TEL. 733-9100  
FAX 733-9100  
WWW.CHICAGO.EDU

CHICAGO, ILL. 60607  
TEL. 733-9100  
FAX 733-9100  
WWW.CHICAGO.EDU

CHICAGO, ILL. 60607  
TEL. 733-9100  
FAX 733-9100  
WWW.CHICAGO.EDU

CHICAGO, ILL. 60607  
TEL. 733-9100  
FAX 733-9100  
WWW.CHICAGO.EDU









Handwritten 277

